

KOPI MO FAASAOSAOGA TALAFEAGAI A SUI USUFONO

ASO TOFI, 13 AOKUSO 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: E faasilasila atu ua toe amatalia nei Taulumaga a le Fono Aoao Faitulafono.

I le agaga faaaloalo ou te ofo alofa atu ma ou faatalofa atu i le paia ma le mamalu maualuga o le tatou Maota i lenei foi taeao fou. E logo i tino matagi lelei, ma ua tatou vaavaaia foi ataata o Tauleleia i lenei taeao i lo outou soifua manuia i le alafai mai i faguga lelei o le paia ma le mamalu o le tatou Maota Fono. E manatu foi o lo o faapena ona tatou feiloai ma nisi o le paia ma le mamalu o le tatou atunuu.

E momoli atu le faafetai ma le faamalo i lenei taeao ona o le tauavagameaina o le tatou Fono pei ona tatou tolopo mai le aso ananafi ona o nisi o faafitauli le maalofia i totonu o le tatou Maota, ae faafetai o lea ua faatino galuega a i latou o lo o fitoitonu i ai le faafitauli i le aso ananafi, e manatu o lea ua foia ia faamoemoe. E ui i lea, o nai toe aso lava nei o le tatou galuega mo le tatou Maota nei, e talosaga atu ai pea ma le agaga faaaloalo i le tatou Maota ia lava pea le tatou onosai. O le faamoemoe lena na autasi i ai Taitai o le Malo ma se manatu o le Fofoga Fetalai, ina ia faaiu pea mea uma o le tatou Fonotaga mulimuli o lenei Paeaiga i totonu lava o le tatou Maota Fono. E pei lava ona maitauina o lo o i ai nisi o tulaga faaletonu, ae o lo o mafai pea ona faaauau le tatou galuega i nai toe aso mulimuli.

O lea foi ua faaaliga i le aso ananafi, masalo o lea o le a papaaveloa le tatou galuega i le aso, o le a tatou mataitu, ae fua lava i o outou finagalo ma manatu ma lagona, ona o le talitonuga o lo o tele le tatou galuega ua uma ona faataatia mo le tatou polokalame o lenei Fonotaga. E faamanatu atu foi le tulaga o le saogalemu i le tatou Maota, ua maea ona tuuina atu faaaliga aloaia ona o le taumafai i le mea na tulai mai i le aso ananafi, ua maea ona tuuina mai le Lipoti ua lelei mo lenei taimi. Ae toe pau lenei o le tatou aso, o taeao ua tatou sauni atu mo le tatou Sauniga Lotu e fai ai le tatou faafetai ma le faamanu i le Atua ona o le auaunaga sa fai mai nei tausaga e tele i tupu ma ee ma tamalii o le atunuu, sa fonotalatala i le tatou Maota, a o lea ua faaiuina ma fai ai Sauniga Lotu mo le tuuina aloaia o le Maota Fono i lalo ae fau le tatou fale fou. O lea, ia lava mai pea le onosai i le tatou Maota, o le a faasolo le tatou galuega mo lenei aso.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51(5).

1. P.P.2015/2016 Nu.41, Lipoti a le Komiti o Mataupu tau le Va i Fafu, Fefaatauaiga ma Tupe Maua i le Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2015.
2. P.P.2015/2016 Nu.42, Lipoti a le Komiti o Tupe Maua ma Tupe Totogi i le Tulafono Tau Faaofi o Iuni Faaunetupe 2014.

LAFO MO LE FAATAATIAESE O TULAFONO TUMAU

Susuga Hon TUILAIPA FATIALOFA AUELUA LUPESOLIAI NEIOTI AIONO SAILELE MALIELEGAOI (Palemia): Lau Afioga i le Fofoga Fetalai, talu ai e 7 Tulafono Tau Faaofi ia e iloilo auiliili i le aso Fono lenei, o lea ou te faatu ai le lafo, *Ina ia faataatiaese Tulafono Tumau 107(4) ina ia avanoa ai le faitauga faatolu o ia Tulafono Tau Faaofi i le aso Fono lenei.*

Faaluaina e le Sui Palemia ma le Minisita mo Faamasinoga ma Pulega Tau Faamasinoga.

Na faamaonia le lafo ma tulai ai Tulafono Tumau 107(4) ua faataatiaese.

TULAFONO TAU FAAOFI O TEUTEUGA O LE TULAFONO O FAIGA PALOTA (NU.3) 2015 – felafolafoaiga faaauau i luga o le faitauga faalua - Aso 3

FOFOGA FETALAI: E tolopo le tatou Felafolafoaiga i le aso ananafi ona o le faaletonu, o lo o saunoa le sui usufono mo Gagaifomauga Nu.1.

Ia, Faimalotoa, tulai maia e faaiu mai le saunoaga ona sosoo ai lea ma le saunoaga faaiu a le Taitai o le Itu Agai ma faasolo ai le tatou galuega.

Tulai mai le sui usufono mamalu.

Tofa FAIMALOTOA KIKA IEMAIMA STOWERS (Gagaifomauga Nu.1): Ia viia lava le Atua ua maua foi lenei avanoa ma lenei foi laolao e toe faatalofa atu ai i lau Afioga i le Fofoga Fetalai faapea foi le Palemia ma le Kapeneta ae le gata i lea o le Taitai o le Itu Agai ma le Sui Taitai, ma le mamalu o sui usufono uma o le Fonousu a le Palemene o le tatou Malo Tutoatasi o Samoa.

E faatalofa aloaia atu foi i lenei taeao fou ma lenei aso fou ua faaopopo e le Atua i lo outou soifua ma so matou ola i le tapuaiga a Samoa i ona tulaga faalupeina. E faapena foi ona manatua e tolopo le tatou Fono ona o le tulaga foi tau eletise i le aso ananafi, ua tau faaiuiu atu foi se faamatalaga a lenei sui usufono, po o se manatu foi o lenei itumalo e tusa ai ma le Tulafono Tau Faaofi e pei ona ua faataatia nei.

Na pau lava sina tulaga foi lea ou te tilotilo au i ai pei ona ou taua ananafi, e leai se agaga i le itumalo faaalaalafaga i Vaimauga ma Faleata. Na pau lava lea o se tulaga i le tilotilo i ai a lenei sui usufono i manaoga ina ia faapena ona maua uma e itumalo faaalaalafaga o le atunuu aoao lea aia tutusa i lalo o lenei Tulafono Tau Faaofi e pei ona aiaia mai i le puipui (d) o lenei Tulafono Tau Faaofi e aiaia ai mo le aiatatau a sulii e aofia ai o latou taitoalua aemaise foi e ui lava ina faapea e le o i ai ni o latou sootaga i le toto i totonu foi o lola palota. I lou la vaivaiga, e faapena se manatu ma moomooga, afai ua tuai mo nei, ona ua maea foi ona teuteu le Tulafono Tau Faaofi ua vaevaeina ai, ae po o ai foi sui usufono mamalu o lenei Maota o le a toe faamanuiaina e toe foi mai i le Maota, atonu o le a silasila i ai mo le toe iloiloaina o lenei Tulafono Tau Faaofi ma faamatagofie atili mo le agai i luma.

E faapea foi se manatu, e fiafia le agaga ona o le avanoa foi pei ona tuuina atu le flexibility po o le faitalia i le Komesina o Faiga Palota ma lana Matagaluga ina ia faapena ai ona fetuutuunai tulaga uma e ao ona faatino ua moomia i lalo o le Tulafono Tau Faaofi e faapena ai ona faatino atugaluga foi sa faapena ona tuuina atu e a outou Afioga, le mamalu o le tatou Fonotaga nei.

Masalo na galo foi ia te au na ou taua ananafi, o lenei foi sa ou faamanatu atu le Tulafono foi e pei ona faaeaea ai le Maota nei mo le itupa malosii lenei se i tulou outou paia ma outou mamalu, le itupa o tina ma tamaitai. E leai, faafetai lava pei ona faafetai atu, aemaise ai o lea ou te manatua foi o le vaiaso na tea nei o lo o molimau foi le Tamaitai Minisita e ona le Tulafono Tau Faaofi aemaise foi le uso a sui usufono ia Gatoloai, na atoa lelei le isi aso atoa, faatoa tulai lava le Sui Komesina ma lona Ofisa i le maea ai o se mafutaga matagofie sa faapena ona fefaasoai ai ma ina ua uma lelei lava fesili a tina ma tamaitai sa afifio mai ai nisi o sui tamaitai mai le motu tele i Salafai, ua o ma le talaiga ua faamalieina, ona ua maea ona faapupula ma faamalamalama lenei Tulafono Tau Faaofi i le aso atoa e lana Susuga i le Sui Komesina. O le tulaga la lea, e leai se mea e toe popole ai pei ona atugaluga i ai, ua faafetai lava i le faaeaea a le itupa malosii i le itupa foi o tina ma tamaitai.

Ia, tatou alo ia i luma, aua e talitonu ua lava lea talanoa, aua o lea na uma ona fai le lauga ananafi, ae faaiu ai, aua tatou te popole, lafoai mea uma o lo o ati le silafaga a le Alii i le tatou tautua.

FOFOGA FETALAI: Aveautau, o i ai se mea o...

Tofa Aveau Tuala Lepale Niko Palamo (Faleata Sasae): Faafetai i lau Afioga i le Fofoga Fetalai. E leai o le mea e fia famalamalama faamolemole.

O lea ua saunoa le... e faamalulu atu foi i le Afioga i le Tamaitai Minisita Lagolago i lou faalavelave foi. E taua le saunoaga a le Minisita Lagolago e faapea ua uma ona faamalamalama e le Sui Komesina le Tulafono Tau Faaofi lenei. O lea ou te fia fesili ai, pe na aumai la se tali a le Sui Komesina i le tolu tausaga lea o le tautua, po o le a tonu le faamalamalama o le tolu tausaga lea na faamalamalama ai, pe na fesiligia foi i le fonotaga lea. Ma le faaloalo lava.

FOFOGA FETALAI: O lea ua maea le saunoaga, e manatu o lea e manino lava le saunoaga a sui usufono. O tina uma sa i ai na matua malilie i le

folasaga a le Komesina. O le agaga lena o lea na molimoli mai. O le finagalo lava o le Afioga i le sui usufono lea sa molimoli mai i le taeao lenei, masalo ua uma ona fai i ai fesili faatina i le Komesina, o lea la ua tali mai le Komesina ua malilie i ai le mafutaga sa fai. Ia ona ou manatu lea ua manino lea tulaga. O lea foi ua maea ona tali manino le Afioga i le Minisita e faamalamalama o le Minisita Tamaitai e a ia le Tulafono, o lea foi ua saunoa manino se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow o le sui usufono tamaitai, ua malilie le itupa o tina. Ia malilie sui usufono, ina ne i o tatou toe toso le laau felefele, a o lea ua faaiuiu mai le saunoaga a le sui usufono, le sui usufono mo Gagaifomauga Nu. 1, se i tulai mai e faaiiu mai lau saunoaga.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai.....

FOFOGA FETALAI: Ia le sui usufono mo Faleata Sisifo.

Tofa Lealailepule Rimoni Aiafi: E fia fesili i le sui usufono mamalu, pe feoloolo nai tamaitai o o, a o le a foi le igoa o le latou Pati? Ma le faaloalo lava.

FOFOGA FETALAI: Ia e leai se Pati a Tina, o le faamaoniga leaga o Tina e lipoti mai foi ia te au, e leai se latou Pati o la e alo uma lava Tina e tofu lava le tina ma itumalo o lo o tauva mai ai. A o le faamalamalamaga ma le faamaninoga o atugaluga, ou te manatu o lea ua saunoa manino le Afioga i le sui usufono mo Gagaifomauga Nu. 1, ua malilie i le faamalamalamaga a le Komesina o Faiga Palota.

Ia le sui usufono mo Gagaifomauga Nu. 1, ua uma lau saunoaga?

Tofa FAIMALOTOA KIKA IEMAIMA STOWERS: Faafetai i lau Afioga i le Fofoga Fetalai, masalo i sui usufono foi sa faapena ona faauilavea, ia o lena ua tali mai e le Afioga i le.....O le atoaga lena sa valaaulia e le Faalapotopotoga lenei o Tina ma Tamaitai na valaaulia le Komesina ma le Ofisa ona o le talosaga a tina ma tamaitai i Upolu nei ma Salafai, ia o lena, ina ua matutu lava ua uma lelei lava fesili taape ua tea le 5:00 o le a ta le 6:00 i le afiafi e mai lava i le taeao i le aso atoa, so, e leai la se mea e pei lava ona fautua atu, ia tatou lafo ia i le Alii o lo o ati Lana silafaga i mea uma, ia faamanuia i a outou palota i itumalo taitasi, ia ou te talitonu o le Tulafono Tau Faaofi ua tataua ona pasi, ma o lo o tele isi Tulafono o lo o faapena ona mulimuli mai. Ia manuteleina ma ia manuia le Fono.

FOFOGA FETALAI: Ia malilie ia le itupa o tama, o lea ua tali manino le itupa o tina, ia mind your own business.

Ia malie ma e faamalulu atu lava i sui usufono o lo o fia tutulai mai, leaga ua maea ona fai le tatou faaiuga ananafi, ua outou silafia foi, e 7 i le 8 a tatou Tulafono ia.

Tulai mai le Afioga i le Taitai o le Itu Agai, pe a te i ua i ai se isi mea e te fia saunoa ai, e leai se isi mea? O lea sa maua e te fia saunoa mulimuli, ia tulai maia po o a nisi sagone o lo o.....

Afioga Hon Palusalue Faapo II (Taitai o le Itu Agai): E faafetai atu i lau Afioga ua maua se avanoa lona lua.

FOFOGA FETALAI: Ia o le ala la lena leaga o lea sa logo mai au e le Sui Fofoga Fetalai, ae ui o lea, ia ua maea ona e saunoa.

E faamalulu atu i lau Afioga i le Tamaitai Minisita, o le a avatu le avanoa i le Tali a le tatou Malo, ia ona tuu atu ai lea o le fesili.

O le a tuu atu le avanoa i lau Afioga i le Minisita mo Faamasinoga ma Pulega tau Faamasinoga, Komisi o Faiga Palota.

Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga, Komisi o Faiga Palota): Lau Afioga i le Fofoga Fetalai ma le mamalu o le Palemene, e faatalofa atu i lenei taeao fou ma le taeao manino, ua maleifua mai i faguga lelei o lau Afioga ma sui usufono mamalu o le Palemene.

E tulai atu e fai se tali i luga o felafolafoaiga o le faitauga faalua lenei o le Tulafono Tau Faaofi o Teuteuga o le Tulafono o Faiga Palota (Nu. 3) 2015. Ma ou te faafetai atu i sui usufono na saunoa, ma ou te iloa o lenei lava Tulafono Tau Faaofi e faasino i Faiga Palota o se Tulafono e taulalata tele i o outou finagalo ma o tatou manatu, aua e le po se lilo, ia le aafiaga o tatou, e le gata o sui usufono o lo o tauaveina le tofi i lenei vaitau, ia ae manatu foi o sui foi o lo o faamoemoe e tauva mo le tatou Faiga Palota mo le tausaga fou.

Lau Afioga i le Fofoga Fetalai, ou te manatu e tolu ni vaega o lau tali e tusa ai ma saunoaga a sui usufono mamalu. O le vaega muamua ou te fia tautala i tulaga aoaotetele po o sini ma auga o suiga o le Tulafono Tau Faaofi o Faiga Palota, o lea lava na faagasolo mai i le la tausaga, se i oo mai i le tatou Fonotaga lenei.

O lona lua, ia o le tautalagia lea o le tatou Tulafono Toe Teuteu o lo o i luma o le Laulau a Fono a le Palemene, aemaise ia vaega o le Tulafono ua lagalaga ai finagalo o sui usufono mamalu.

Ia ma lona tolu, o isi mataupu na laga mai i mataupu lava tau Faiga Palota ae le o i ai i totonu o le Tulafono Tau Faaofi Toe Teuteu lenei.

Ona ou amata mai lea lau Afioga i le Fofoga Fetalai i le tulaga aoaotetele ma sini ma auga autu o le Toe Teuteuga o le Tulafono o Faiga Palota e faagasolo mai i le la tausaga se i oo mai i le tatou Fonotaga lenei. Ma e pei foi ona ou faamatalaina i le faataatia muamua o isi a tatou Toe Teuteuga, e lua lava ia vaega ogaoga o suiga sa faamoemoe i ai Toe Teuteuga o Faiga Palota o lo o faagasolo. O le mea muamua, o le faamutaina lea o le lisi o le au palota o le Palota Taitoatasi ona tasi ai lea o le lisi palota mo le atunuu atoa. Ma le vaega lona lua, o le vaevaeina ia o tatou itumalo e lua o latou nofoa e pei foi ona tatou pasia i a tatou Toe Teuteuga ua mavae. Ma o vaega e lua ia ogaoga o suiga o lo o faagasolo nei, ma o le faamutaina o le Lola o tagata Palota Taitoatasi, ua faapea ai foi ona faavaeina ia itumalo Tu Taulaga, lua itumalo o Faleata ma Vaimauga. Ma o se faiga fou lea i le faagasologa o Faiga Palota i le faatulagaina lea o ni itumalo Tu Taulaga ma o se mea fou. Ia ou te manatu ou te le toe tautalagia, aua o lea ua maea ona pasia e le Maota ia tatou itumalo ia, ae ua aveai foi le faavaeina o tatou itumalo ia tu taulaga o lo o aliae mai ai ia nisi vaaiga po o nisi faiga fou, ia e ao ona tatou tapena maeaea i ai.

Lau Afioga i le Fofoga Fetalai, i na vaega e lua ua ou tautalagia i le tasi le Lola o le a palota uma ai ia tagata palota i totonu o Samoa ma ua le toe i ai

loa le lua o Lola sa tatou i ai, aua a lua ni Lola, ona foliga mai lea, e i ai se vaega o le atunuu e ese mai latou. O lea la ua taua ai le tasi lava o le Lola e tatou te faafoeina ai a tatou Faiga Palota. Ae na o le pau le mea fou, ma o le tali atu foi lea i mea ua aliae mai i nei mau tausaga e tele talu ona faavae le Faigamalo a Samoa, o le tali atu lea i le gasolo mai a le atunuu ma nofoia o tatou fanua umia saoloto i totonu o le lio o le taulaga – ma ou te manatu o lea foi e tatou te malamalama uma i ai, aemaise lava le itumalo nei o le Vaimauga ma Faleata e aliae mai ai se finagalo i itumalo faaalaalafaga ia e lua, o Vaimauga i ona itumalo e lua, Faleata i ona itumalo e lua, ua i ai se agaga ua aliae mai i a tatou Faiga Palota ua mavae, ua tau faoa ia le maopoopoga o itumalo faanuu ma alaafaga po o territorial constituencies o le atunuu o lo o fai mai i totonu o le lio o itumalo nei tu taulaga. Ma o lea ua tatou oo atu lava i ai e fautuaina foi ia le Malo ma aumai foi le Tulafono i luma o le tatou Maota nei tatou vaai ia se fuafuaga mo ni Nofoa ia e tau, o Nofoa Tu Taulaga ia ma faatulaga ai loa a tatou Urban Seats.

Lau Afioga i le Fofoga Fetalai, i tua atu o sini ma auga autu ia e lua e pei ona ou tautala i ai, ou te toe faamanatu i le mamalu o le Palemene le faavae autu lava o a tatou Faiga Palota. O le a le faavae lea? O le faavae o le Faamatai. O lea foi na ou tautalagia muamua i o outou tuua ma ni o tatou matua, o e na foafoa mai le tatou Faigamalo ma faia ni faaiuga o Faiga Palota a le Malo fou a Samoa o le a faavae i luga o le Faamatai. Ma i lena vaitau e tatou te toe manatua, pei ona faitau foi i ai i le mau o lo o faamaumauina, e fai atu le tatou Fono Faavae i Malo Afaatasi o le manao lea o tagata Samoa ina ia faavaeina a latou Faiga Palota i luga o le Faamatai, ae tali mai le Malo Afaatasi, ua ao ona faia se tatou filifiliga e ala i se Palota po o se Referendum ona o le vaaiga Faatemokarasi, o le palota o le tagata ma lana palota. A o lea ua tatou faatu atu e faavae i luga o le Faamatai, e palota na o matai toe na o matai foi e mafai ona tulai mai e fai ma sui i le Maota. Ona fai lea o le Faiga Palota Tele po o le Referendum le Pelepesite a le tatou atunuu, tali mai le atunuu, e sao le mea na fautuaina i le tatou Fono Faavae. Ona faapena ai loa lea ona faavae ai a tatou Faiga Palota i luga o le Faamatai.

E ala ona umi sau faamatalaga lau Afioga i le Fofoga Fetalai ma le mamalu o le Palemene ma toe foi i tua, ona o a fesuaiga uma e tatou te faia mai lea taimi i lea taimi i a tatou Faiga Palota, ae le mafai lava ona lilo atu i le tatou vaai le Faavae mautu lea o Faiga Palota a le Malo o Samoa e Faavae i luga o le Faamatai. E ao foi ona taofiofi le iumaea aemaise le Faigamalo mai i lea taimi i lea taimi ina ia le lilo atu lena Faavae i suiga e tulai mai i lea taimi ma lea taimi.

Lau Afioga i le Fofoga Fetalai, ona ou faasolo mai ai lea i le tatou Tulafono Tau Faaofi lea o lo o faagasolo nei, ma ua saunoa foi i ai ia sui usufono mamalu o le Maota. Lau Afioga i le Fofoga Fetalai ma le mamalu o le Maota tatou te le i auai faatasi i le Fonotaga talu ai a le tatou Palemene ona o le le atoatoa o le malosi, ae peitai, o lea ua saunoa le Taitai o le Malo, o le toe aumai o lenei Tulafono Tau Faaofi. O le tali atu foi i finagalo faaalua o sui usufono i le tatou Fono talu ai. Atonu o le uiga foi lea o le galuega faale-Malo. E i ai lava tapenaga a le Malo e faaaua mai i Tulafono Tau Faaofi ae le tuua ai foi le faalogologo i mau o lo o aumai aemaise foi pe a faapea o ni mau e talafeagai.

E i ai nisi mau e aumai ona tuu atu lea ma tatou fua i le faafeagai ai ma Tulafono e puipuia ai tatou galuega i lea vaega ma lea vaega, a talafeagai ua faapena ona fai, a leai foi, ona faapea lea ona faataatia.

O le uiga lena o le tatou Tulafono Tau Faaofi o lo o faagasolo nei o le tali atu lea a le Malo i saunoaga ma fautuaga a sui usufono ua lafo mai i le Malo i luga o felafolafoaiga o tatou Fonotaga. Ia, ua tali atu le Malo ae pei ua i ai se faafoliga i nisi o mataupu o lenei Tulafono Tau Faaofi o lo o tetee nisi. Ma atonu ou te amata atu ai i le mataupu lea po o le fuaiupu o lo o teuteu ai agavaa o sui tauva, ma ua faatulagaina ai le tolu tausaga e tautua ai le tagata i le Nuu ona faapea ai lea ona agavaa e tauva o se sui tauva mo le faiga palota.

Lau Afioga i le Fofoga Fetalai ma le mamalu o le Palemene, e toe foi lava i tua lau faamatalaga i le faavae o tatou faiga palota o le faa-matai. O le faa-matai ou te le tau faamatalaina atu i lau Afioga i le Fofoga Fetalai ma le mamalu o lenei Palemene. O le matai o lona faasinomaga o lona aiga ma le nuu. Ae a oo loa i upu o faiga palota o tatou itumalo, o le tagata ua tausia aiga ua fai ma sui o lona aiga i totonu o saofaiga a le nuu. O le uiga lena o le matai. Ma pe alaala i le nuu ma le itumalo pe le alaala ai foi ona o nisi o fuafuaga faale-soifuaga e pei o galuega e toesea mai ai, ae le mafai ai lava ona aveesea le uiga o le matai ma lana tautua e tausia aiga, e fainuu, e fai-Ekalesia, o a mea uma e tautuaina ai le nuu ma le itumalo.

E le o se mea fou lea mea ia tatou. Ma e pei ua fai sina te i o lau faalogo i le faapea mai o nisi o saunoaga ua fai lenei suiga o se auupega. O se auupega e noatia ai pe vaea ai nisi o lo o i ai le faamoemoe e fia tauva i faiga palota. Lau Afioga e ma le mamalu o le Palemene, e leai lava se isi faavae o fai ai faiga palota a Samoa, e faavae lava i le faa-matai. Ma o le matai lava ia, ou te manatu a faapea e i ai se sui usufono i totonu o le Maota lenei e le i faia sana tautua, e le o faia sana tautua e mafai ona saofai i le lio lenei. E malie lava a outou saunoaga, e iloa lava e nuu ma afioaga le tagata e le i faia sana tautua ma e le palota i ai, ia ae tailo.

Lau Afioga i le Fofoga Fetalai ma le mamalu o le Palemene, a tatou toe tepa i tua i le faagasolo mai o lea Paeaiga ma lea Paeaiga, e ono mafai lava ona tatou faitau e i ai nisi na sao mai i totonu o le Maota lenei faatoa o atu lava i le taimi o le palota ulufale mai ai. Ona o le a? O lea sa saunoa ai nisi o sui usufono mamalu, o le tupe. Ia o le fesili, o se mea lea tatou te fialia e fai? O se mea lea tatou te fialia e faatupu i totonu o nuu ma alaalfaga? A tagi talatala mai a outou Afioga i le tui pea o tatou e le aufai palota, o le fesili; o ai na faia le mea lena? O ai na faia le mea lena? O le mea lea lau Afioga e i le Fofoga Fetalai, aua lava le alo a tatou upu, e leai lava se isi faavae o fai ai faiga palota a le atunuu lenei, o le faa-matai. Lau Afioga i le Fofoga Fetalai ua ese isi ituaiga faa-matai ia ua aliaie mai e fai ai a tatou faigapalota.

FOFOGA FETALAI: Malie lava lau Afioga i le Tamaitai Minisita o lo o i ai le faauilavea a le sui usufono mamalu.

Afioga Peseta Vaifou Tevaga (Faasaleleaga Nu.4): Ou te faafetai atu i lau Afioga i le Fofoga Fetalai, e faatalofa atu foi i le paia maualuga i le Afioga i le Taitai ma le Aiga Minisita, le Afioga foi i le Sui Taitai ma le mamalu foi o lena Itu faapea foi le mamalu o le Maota ua potopoto i lenei taeao fou. Ua taliga lava e fia faalogo le matagofie foi o le saunoaga a le Afioga i le Tamaitai Minisita. Sa faalogologo lava ma le totoa ona o lenei Tulafono Tau

Faaofi, o lea ua faamalamalamaina e le Afioga i le Minisita. Ma atonu foi lau Afioga i le Fofoga Fetalai, o au foi le i si sui usufono na faamamafa i ai vaega ia i lau lauga i le aso ananafi. E tulai atu ai la ma le agaga maualalo e fia avatu ni nai manatu e talifuitau ai foi le saunoaga a lau Afioga leaga o lea e faafofoga le Maota.

FOFOGA FETALAI: E faamalulu atu i lau Afioga i le sui usufono, sa ou manatu o se i si tulaga e aafia ai leaga o lea e tuutalaloa saunoaga a le Minisita e le i aafia lou finagalo. O lea e tau faamalamalama o le tulaga aoatetele lea e tali mai ai le Minisita i le faatulagaga o aafiaga. Ae faamalulu atu ne i te i ua tatou toe tatala le mataupu ia ona tatou le manino lea, ae malie o lea ua maua atu le mea lea e te atugalua ai. O le saunoaga a le Minisita o lo o faamanino auala na afito mai ai nisi o le mamalu o le Maota, o nisi na nonofo nonofo i fafo omai lava sao. Ia o nisi e evaeva a i le taulaga o atu sao, a o lea e faamalamalama e le Minisita e leai se Afioga latou te le silafia le sui usufono e tatau ona aumai. Afai foi e sao mai se isi i se togafiti, e le umi, ioe, e alu alu lava papau le laulau ma matu le fau lea e atugalua i ai le Minisita. E le o le tupe. O la e iloa lelei e Itumalo tagata e o atu e genuine le latou alolofa, e ala ona faatino mea ia ona o le moni o le alofa mo le Itumalo ae le na o se aso se tasi. O lea la e sagatonu le finagalo o le Afioga i le Tamaitai Minisita ae malie Peseta e le o taua lou finagalo. O la e foi e silafia e le tatou itumalo lau tautua. Don't worry about the money, money is not the problem you are the problem.

Malie lava lau Afioga i le Minisita, se i tulai mai le sui usufono mo Gagaemauga Nu.2.

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, leai e le o le itu lena leaga o matou ua matou tau nenefu atu ua matou le iloa po o se mea e fia faasao po o se mea e fia faasese lea e tulai mai ai le sui usufono lea.

FOFOGA FETALAI: Leai, ia malie o lea ua manino, o oe foi le i si tagata aua e te taugapa tele i le tupe ae faaoga le tautua moni mo le itumalo.

Tulai mai lau Afioga i le Tamaitai Minisita e faaauau le saunoaga.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai. Ona faaauau atu ai lea o sa matou faamatalaga i le uiga lava o le upu lenei o le faa-matai. Ia o nisi a tatou felafolafoaiga foi i nisi teuteuga o le Tulafono o Faiga Palota, sa i ai foi finagalo faaalua aemaise foi o le saunoaga a le Palemia, tatou taupule ola ia i le faamoemoe o lea tausaga a toe foi mai o le isi galuega tele lea e tatau ona toe oo atu i ai le Paeaiga o lena foi palota o lo o loma mo le tausaga fou, o le toe iloilo lea o faavae o faiga palota. Ia o le a le mea e iloilo? E iloilo le faa-matai. Ae i le faalogologo atu i lenei taeao ma lenei vaiaso talu ona amata le tatou Ffono ma tautalaga foi lenei toe teuteuga, o lea ua aumai se mau e faapea o se auupega lenei e vaea ai nisi. Lau Afioga i le Fofoga Fetalai a faapea o se auupega le Tulafono Tau Faaofi lenei ma le toe teuteuga i le vaega lea o le tautua, o le auupega e toe poupu ai ma toe faamalosi ai le faavae lea e faavae ai a tatou faiga palota o le faa-matai. Ia aliali mai i le gaoioiga a le tagata, a le matai ua fia tautua i lona itumalo le moni o lona faamoemoe. Ia atonu o le tolu tausaga na o se fua

lea ae mafai foi ona tatou faapea, sefulu tausaga. O le sui usufono, o le tofi taua e faia tonu o le atunuu i lona atinae e saili ai manuia o Samoa. O lea la lau Afioga i le Fofoga Fetalai e le solomuli foi le Malo i le faapea mai o se auupega, a faapea o se auupega o se auupega ina ia faamalosia, toe poupouina, faamautuina le faavae o le faa-matai lea e fai ai a tatou faiga palota.

FOFOGA FETALAI: Malie lau Afioga i le Minisita se i tuu atu le avanoa i le sui usufono mo Gagaemauga Nu.2.

Tofa Levaopolo Talatonu : Lau Afioga i le Fofoga Fetalai o le mea e fia faamalalama. Ou te faamalulu atu i le Afioga i le Tamaitai Minisita, o lena ua manino uma le tulaga pei ona ia aumaia ai le faavae tonu lava lea e faavae ai le tatou faiga palota o le faa-matai. Ou te fia fesili atu i le Afioga i le Tamaitai Minisita, pe o le palota o se faa-matai? Aua e manino lava le tulaga o le faa-matai ia agai i le saofaiga ma pulega a alii ma faipule i tua i o tatou alalafaga ma nuu. Ae oo mai loa i totonu o le Palemene, e le o se faa-matai lea e fai ai le tatou Palemene. O lea tatou te fefiloi faatasi ai ma le faiga palota faapapalagi. Afai la ua silasila le Afioga i le Tamaitai Minisita o le a tatou fetagofi e matua faatulaga lelei le faa-matai ona tatou toe foi lea i tua i le mea sa i ai le faa-matai moni e filifili sao mai lava e itumalo sui usufono e aunoa ma se palota.

E pei o le tulaga lena lea ou te tau soso atu ai ma le agaga faaaloalo ae faafetai lea ua manino le saunoaga a le Afioga i le Tamaitai Minisita.

FOFOGA FETALAI: Ia o lea ua maua lou finagalo. Aveautau, se i tulai mai.

Tofa Aveau Tuala Lepale Niko Palamo: Lau Afioga i le Fofoga Fetalai, e faamalulu atu i lau Afioga i le Minisita, atonu o lea ua maua le avanoa e avatu ai foi se fesili o le mea e fia malamalama. O se mea foi e fia fesili ai e fia malamalama ai. O lea ua tau foliga mai o lea ua ou tau vaavaai atu i le ata o le uiga o le upu tautua lea sau i le Tulafono Tau Faaofi, o le faa-matai. E pei ona silafia e tele lava uiga ia na saunoa i ai isi i mea foi nei o tagata e le i matai ae sa faataulealea.

O lea la ou te fia malamalama i lau Afioga i le Minisita, o le tagata la faatoa lua tausaga e le i oo i le aso lea pei ona fai mai ai le Tulafono Tau Faaofi lea, faatoa matai nei pe lua tausaga talu ona matai ae oo i le taimim e maua la sona avanoa e alu ai i le palota pe afai o le faa-matai lea? O le faa-matai lea e mean ai, o le taimi a e te matai ai e fai lau tautua i le nuu?

Afioga Hon FIAME NAOMI MATAAFA: A o le vaega lena o le felafolafoaiga i luga o le faitauga faalua, o aoatetele o faavae ma auga ma sini. O outou o sui usufono, o lea toetiiti uma le lima tausaga o lena Paeaiga, tou te le i malamalama lava i le vaega lena?

Tofa Levaopolo Talatonu: Lau Afioga i le Fofoga Fetalai o le mea la e fia faasao. Ae sa e saunoa ona tali mai lea o le Afioga i le Associate Minister e i ai le mataupu na ou fesiligia ai...

FOFOGA FETALAI: O lea o le a ou fai atua le tali, malilie sui usufono. Silasila foi i le faamalamalama lea na faamalamalama aoatetele mai ai le Minisita, o fuafuaga alualumamao a le tatou Malo pe a tatou toe fo'i mai ona tatou o loa lea e lote le ute o faigamea o le aano lea e saunoa ai le Minisita o le tatou toe matua o e clarify lelei le mea lea e tupu aua a tatou vaai atu nei e le o filemu o outou finagalo ona o le tatou taumafai e define le mea e tosi ai le laina o mea ia tatou te vevesi ai. O tulaga aoatetele la ia sa outou saunoa ai i a outou saunoaga i le faapulapulaina o le tautua o lea e taumafai atu le Minisita, afai e le manino i le taimi nei ua tatou tutulalata i le faiga palota, o fuafuaga alualumamao a le Malo o le a tatou o e lote le aano o le mea atoa. A o lea foi na outou saunoa ina ia o lea la o le a tuu nei le faamaninoga o outou saunoaga na fai muamua a o lea o le a tatou agai ona o fuafuaga a le Minisita lea ua faataatitia. Malilie sui usufono, ua ou faamalulu atu, o lea o le a tatou agai e toe toso tele atu a o lea e manino le faamalamalama a le Afioga i le Tamaitai Minisita. Leailepule....

Tofa Lealailepule Rimoni Aiafi: Lau Afioga i le Fofoga Fetalai, malie lou finagalo o lea ou te malamalama i le finagalo o le Minisita i mea taitasi leaga o lea ua saunoa soo le Minisita faalauaitele o le mafuaaga o faiga palota o le faa-matai. Ia manatua foi lau Afioga, e moni le Afioga i le Minisita i le faa-matai na amata mai ai. O le mea lea ua agai ai tatou e le na o Samoa, e fuafua foi i atunuu tetele o lea tatou te avea ai ma sui, lea na aliai mai ai le mea lea o le Universal Suffrage lea ua uunai mai ai le faateteleina o sui tamaitai i totonu o le Palemene. O mea nei e le o ni mea faa-matai, o mea o lea e apply.... O lea e fai ma fesuisui ai faiga palota a tatou mo le agai i luma, e le toe aoga la le mea lea e saunoa mai ai. O le mea na amata ai a o lea ua fesuisui ai e tusa ai...

FOFOGA FETALAI: O lea ua maua lau finagalo Lealailepule, taatia o lea o le a....

Afioga Hon FIAME NAOMI MATAAFA: Lau Afioga i le Fofoga Fetalai, o lea tonu lava la ua maua mai i le leo o le sui usufono mo Faleata Sisifo, ua le toe aoga le faa-matai. O lea la lau Afioga i le Fofoga Fetalai ma le mamalu e o le Palemene, o ai lea e nonofo i totonu o le Maota lenei, e i ai ni taulelea i i? E leai, na o matai. Ona o le a? O le Faavae lena o lea na fai e outou tuua ma o tatou matua.

Lau Afioga i le Fofoga Fetalai e tutu mamao finagalo o le Maota, faapea mai o le faiga palota e le o se faa-Samoa lea. Tailo i ai, ae a fili le tofa i lou mafuaaga po o totonu foi o tatou aiga, pe le faitauina tatou palota, a o le taitai po o le matai e lelei e faitau e le matai po o fea le mea lea e alu ai le finagalo a le aiga. Ae i ai foi taimi e tu ai lava le tagata i lona tulaga taitai faa-matai ma faapea atu, ia outou malilie ia, e le o sao, e le o amiotonu lena mea, o uiga na faa-taitai. A tatou toe foi mai lava i faiga palota i mea ia e toe tutu mai ai a outou Afioga i sui usufono, leai, faitau lelei auala na fai ai faaiuga a outou tuua ma o tatou matua. A ua saofai Samoa i le saofaiga o Malo, e tataua lava ona tatou faaogaina faiga ma tu, fai le palota. A o le lava na tuitui atu lava outou tuua ma tatou matua, lelei, ae fai agai ia matou matai ona o latou ia o taitai o matou aiga, o taitai o matou nuu, o taitai o matou Itumalo. O i ina, e

maua ai le toafiamalie, le maopoopoga ma le filemu. A lea ua saunoa mai sui usufono, ua le toe aoga, talofa, talofa lau Afioga i le Fofoga Fetalai.

Tofa Lealailepule Rimoni Aiafi: Lau Afioga i le Fofoga Fetalai o le mea e fia faamalamalama lau Afioga.

Afioga Hon FIAME NAOMI MATAAFA: O le mea lena o lea ua fai atu ai a ua faapea mai le sui usufono o le auupega, ua tataua ona fai le auupega. Aisea? Ua taa le agaga lea, ua taa le gaga lea i totonu o le tatou atunuu ua le toe aoga le faa-matai, ua le aoga uma outou lea e nonofo i i.

FOFOGA FETALAI: Malie lau Afioga i le Tamaitai Minisita.

Tofa Lealailepule Rimoni Aiafi: O le mea tonu lava lea e tau o le auupega lea e saunoa ai le Minisita mo le faaogasese le feuiaga o upu. O lau tala lea na fai atu e le toe aoga le faa-matai e le o le uiga atoa lea. O le uiga o le faamatalaga na fai atu, o le naunautaiga na amata mai tatou tuua e na o matai e omai i le Palemene e na o matai e palotaina matai ae na sui lava e tatou, na sui e le Palemene, ua le toe palota na o matai ae ua palota ma tagata ua 21 tausaga, o suiga na. O lea ua palota tatou aumai i totonu tina i totonu o le Palemene, o suiga na. O le a la le mea e le toe faafoi ai i tua? Sa i ai lau Afioga i le Minisita i le taimi na fai ai suiga nei ma sa e le saunoa tetee i ai. Ia o lena, o le a le mea ua ala ai ona faapalota matai i totonu o urban areas ae le palota i tua i o latou nuu o la e matai ai? O suiga na.

FOFOGA FETALAI: Malie Lealailepule o lea ua maua lau finagalo. Se i tulai mai se tasi o sui usufono mo Vaimauga Sisifo, Tofa Lefau Harry Schuster.

Tofa Lefau Harry Schuster (Vaimauga Sisifo): Lau Afioga i le Fofoga Fetalai, o se mea e fia faamalamalama. E faamalo atu i le Afioga i le Minisita mo le faamalamalama o le mataupu. Lau Afioga i le Minisita ou te le tetee, e matuai ou au aua o le faa-Samoa ia o matai o totonu o le Palemene ma e vaaia aiga, e ese mai lava tatou i isi atunuu o le lalolagi. O le mea e fia malamalama lau Afioga i le Minisita ua le feteenai la le tolu tausaga lea ua tuu nei i lalo o le faiga palota o le a eseese ai matai ma toe feteenai ai i le tulaga lea tau matai. O lau la vaai i ai i le tofiga o le matai e tofi e le aiga. Ua ala ona tofi e le aiga ona ua agavaa le tagata e taitaiina le aiga i totonu o le aiga ma totonu o le nuu, le itumalo ma le atunuu. A o lea ua faaeseese ituaiga matai, o le matai e i lalo ifo o le tolu tausaga talu ona matai e tutusa lelei lava ona tiute ma tiute o le matai ua tolu tausaga pe sili atu. Ae na pau lava la le eseese, e mafai e le isi matai ua tolu tausaga i luga ona alu i le palota ae le mafai e le matai lea e le i atoa le tolu tausaga e alu agai i lalo ae leai ma se eseese i le aganuu ma le faa-Samoa o le tofiga e fai ai o le tiute o le matai.

FOFOGA FETALAI: Lefau o lea ua maua lou finagalo

Afioga Hon FIAME NAOMI MATAAFA: O mataupu uma nei o le auiliiliga ia tatou o pea i luga o tulaga aoatetele.

Tofa Levaopolo Talatonu: Lau Afioga i le Fofoga Fetalai...

FOFOGA FETALAI: Malilie sui usufono, o lea ua maua.... Levaopolo o lea ua ou maua lou finagalo.

Tofa Levaopolo Talatonu: Leai, leaga o lea ua taua le tulaga lea ma e puupuu lava lau fesili i le Afioga i le Minisita, o ai la na faia suiga ia? Na amata mai lava o outou faia suiga a o lea ua toe tau mimilo i tua faa-matai ae na outou suia uma lava le Tulafono lea agai atu i le faiga palota.

FOFOGA FETALAI: Levaopolo, alaala mai i lalo le sui usufono. Se o le mea lena e tau o le soli Fono o le taofiofi atu lava ae fai. Ia outou finagalo malilie o lea ua oo i le taimi e tali ai le Malo ia outou finagalo malilie . Ia silasila outou o le a tolu aso o debate le mataupu lenei? Ave le avanoa se i tali le Minisita. Vaai i le manino o le folasaga a le Minisita, o lea ua tatou iloa le mea lea ua tupu. O lea ua tatou vaavaai i ai ma o lea foi tou te atugalua mai ai le tulaga po o ai na faia suiga na fai e le Palemene. Aisea na fai ai? O le faautautaga tataua mai lea taimi i mea ua tutupu, we are no longer isolated, we are Westminster System. O lea e agai i ai le Palemene e faatino. A o le ute lea e saunao i ai le Minisita, o ai? O tatou. O ai na filifilia tatou? O le pule lea e saofai mai tua. O lea la e agai i ai le faamalamalamaga a le Minisita, a tatou toe foi mai po o ai e toe foi mai, tatou toe tilotilo lea i le ute lena, o le filifiliga o sui usufono mamalu o le Palemene ma le faa-matai, aua e leai lava se isi mea e malu ai le atunuu, nothing else, o le pule mamalu a alii ma faipule na filifilia tatou. O le mea lena o lea e malu ai Samoa, o a uma tulafono, o a mea uma tatou te faia ae a leai le faamalumaluga lena ma le faamalumaluga a le Atua, e leai se mea e sao. Malilie sui usufono, ave le avanoa se i tali manino le Minisita, o mea taitasi, o lea e maua lo outou avanoa, ae aua tou te tetee i le upu lea auupega, it's a debateable issue ae aua tou te atugalua, ave le avanoa se i tali manino le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, o le upu auupega, e le o se upu a au, o le upu a le Itu lela. O lea la na ou faamalamalama atua i le gagana o le auupega, o le auupega lea e poupu ai le faa-matai o le faavae o le tatou faiga palota o le mea lea o le a tau sola atu.

FOFOGA FETALAI: Malie lava lau Afioga i le Minisita, se e ava tele atu ona o le Taitai o le Itu Agai ma se tasi o sui usufono matua. Se i tulai mai muamua lau Afioga i le tamalii o le nuu, tulai mai Toleafoa.

Afioga Hon Leaupepe Toleafoa Apulu Faafisi (Aana Alofi Nu.1): Lau Afioga i le Fofoga Fetalai ona o lea ua inaina lava nisi o sui mamalu i le upu lea faa-matai, ae o le upu faa-matai a toeiaina matai, aua e leaga e eseese matai, o le isi matai e filifili faa-suli e filifili e suli. O le faa-matai la e fai le faaiuga i le mea e mafuli i ai suli. O lona uiga la e leai lava se eseese ma le palota. A o le isi matai e filifili faa-sao o le tasi lena eseese. Ae ua ou tulai atu e faamanatu atu le tala faa-matai leaga o lea matou te tausia i tua, e faatauta loa le tuagane i le tuafafine ona faapea loa lea o Toeiaina, "Sole se o le mea lena e iloa ai lou palaai, o lou palaai o lou faatauta i lou tuafafine." Ua

ou vaai atu ua matua inaina le Itu e Agaia le Malo, ua leai lava se isi e le tulai i luga, ae faatauta lava i le Tamaitai Minisita a o le tamaitai, ioe. O le mea lea e iloa ai le palaaai. Ma lou faaaloalo lava, faafetai.

Afioga Afualo Wood Uti Salele (Salega): Lau Afioga i le Fofoga Fetalai o se mea e fia faasao, o le tuafafine a o le matai. Faafetai.

FOFOGA FETALAI: E le palaai le sui usufono mo Salega, Afioga Afualo Wood Uti Salele.

Afioga Hon Palusalue Faapo II: Lau Afioga i le Fofoga Fetalai, sa nofonofo lava ma le toto. Faafetai lava i le Afioga i le Tamaitai Minisita. Ae ua ala ona lagalaga finagalo o lenei Itu ona o la e lauga faalauaitele mai, ae o la e aumai ai ma isi mea na e tatau ona fesiligia e le Itu Agai aemaise o le lauga faalauaitele o lea e aumai ai ma tuuaia lenei Itu e pei o le auupega lea ua aumai. O le mea lea e tatalo atu ai i lau Afioga i le Fofoga Fetalai e tuu mai pea se avanoa ona o lea e lauga faalauaitele le Minisita ae o la e aumai ai tua ma isi auupega la e i ai. O le mea lea e tatalo atu ai lau Afioga.

FOFOGA FETALAI: Malilie aua nei outou atugalua i isi faiga fuafua mamao a le Minisita lea e aumai. Silasila foi, ua ala ona lagalaga, o le finagalo o le Minisita, a tatou toe taliu mai ona vaavaai lea i isi fuafuaaga alualu mamao. Ae malilie sui usufono, ou te manatu ua manino ma malamalama le.... Ae tulai mai lau Afioga i le Minisita e faaauau le saunoaga.

Afioga Hon FIAME NAOMI MATAAFA: Faafetai atu i se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi le lagolago mai foi i si nei loomatua ma le taumafai atu i le tatou Tulafono Tau Faaofi. Na pau lava le mea, ua galo ona fai mai lou tiputa nei i le taeao e vave susue atu ia outou ona outou iloa ai lea, ai a e faapea o se toa tamaloa lea tou te talanoa i ai, ae leai o le tamaitai. Ae le o se tamai tamaitai foi ae se i ou toe sau i se isi taeao toe aumai lou tiputa e fai ma faamaoniga o lenei mea.

Lau Afioga i le Fofoga Fetalai e lelei lava le tatou fai mea talitalie ne i te i ua faapea ua ita se isi. Lau Afioga i le Fofoga Fetalai, ne i te i ua tatou vevesi lenei vaiata a o lea e i ai le taimi e loloto ai le filiga o le tatou faavae o faiga palota, ae na o le pau lenei o le mea, e tatau lava ona tali le Malo i le auupega. Ae ou te toe faamanatu atu i lau Afioga i le Taitai o le Itu Agai, e leai e le i laga atua le upu auupega e le Itu lenei na laga mai e le sui usufono o le tou Itu.

Tofa Levaopolo Talatonu: Lau Afioga i le Fofoga Fetalai, ona o au lea sa ou taua le upu lea lau Afioga, se i faamalamalama atu le uiga o le faamatalaga.

FOFOGA FETALAI: Se i uma ona avatu lea o le avanoa le sui usufono mo Gagaemauga Nu.2.

Afioga Hon FIAME NAOMI MATAAFA: Ae aumai o se auupega leaga, auupega e vaea ai ma noatia ai avanoa o tagata o lea na fai upu e aumai ai ma

lafo mai lena upu o le auupega. O lea na saunoa atu le Sui Fofoga Fetalai i le sui usufono ina ua lafo mai lena upu e tau.... se i tau faifaimalie lafoga i totonu o le Maota, aua a tatou tau loa le upu auupega, e mafai ona faaumatia ai le tagata ma e le o se faaupuga e taligofie e le Faigamalo lenei. E tele lava auupega, o auupega lelei, o meafaigaluega. E pei e lelei le tatou o i meafaigaluega atonu e le o se upu ogaoga tele lena upu, ae ao ona tali atu le Malo e faapea, ona e taofiofi le iumaea. Aua e ui e faapea e i ai se taeao e toe fili ai le tofa ma le faautaga a le atunuu i le faavae lea ae o lea ua amata ona toli atu iinei i totonu o le Maota nei. A o ai lea e nonofo ai? E nonofo ai matai Samoa, matai Samoa lea tatou te tiu ai. Ma e ao lava ona tatou mafaufau loloto i ai, sau ia taeao o i luma ona faapena lea ona faaauau le tatou felafolafoaiga, aumai foi le tofa ma le faautaga a le atunuu.

FOFOGA FETALAI: Malie lava lau Afioga i le Tamaitai Minisita, o le a tuu atu le avanoa Levaopolo.

Tofa Levaopolo Talatonu: Faafetai. Se ua ou toe tulai atu lau Afioga, malie lava, ona o lea pei a interpret i se tulaga matuia le upu sa ou taua. Ae o le uiga o lau faamatalaga, o le mea lenei o le Tulafono, e sili atu ona maai se i tulou lava le faafofoga a le atunuu ma le paia o le Maota, e le o se isi lava auupega. Ae ou te le o fai atu nei o le Tulafono Tau Faaofi lea o le auupega. Sa ou talanoa faalauaitele i le mea lea o lea o le Tulafono. Aua po o le a le fia ulavale o le tagata, e mafai lava e le Tulafono ona faavaivai ane i lalo.

E pei o le tulaga lena sa i ai sau faamatalaga.

FOFOGA FETALAI: O lea la ua manino, e pei o se auupega ae le o le auupega.

Ia tulai mai lau Afioga i le Tamaitai Minisita.

Afioga Hon FIAME NAOMI MATAAFA: Ia, lau Afioga i le Fofoga Fetalai, o upu a le atunuu, “E i ai e faalele, e i ai e maitau.” E finagalo malie foi la le sui usufono ia e faalele, ae o lea foi matou te nonofo ma maitau, ae ao lava ona matou tali atu. Ma e sao, o Tulafono e mafai ai ona fai isi mea, ae le mafai ai ona fai isi mea. A o le Tulafono Tau Faaofi lenei, i le vaega lava lea o le tautua, ia tolu tausaga, o le agaga o le Tulafono Tau Faaofi ina ia mautinoa, o ē e fia tauva i le palota, o tagata ua agaga atoa mo le itumalo, e le alu atu nei mo taeao. Ma ou te malamalama uma lava i ai i lena tulaga.

Ona ou see mai ai lea lau Afioga i le Fofoga Fetalai i le vaega lava lea o le tautua, ua momoli mai ai le mau aemaise lava o le Afioga i le Taitai o le Itu Agai e faapea, talofa e i tamaitai, talofa e i tamaitai, o le a avea lenei suiga, e vaea mai ai le toatele o tamaitai o lo o i ai le faamoemoe e fia tauva i a tatou faiga palota, ma faapea mai ai foi, pe le o le Malo ea lenei na faia le Tulafono o le Toe Teuteuga o le Faavae lea ua avanoa ai Nofoa e lima po o le faapea; ia le i lalo ifo o le lima sui usufono tamaitai i totonu o le Palemene o Samoa, a o lea lava ua toe fai e le Malo le mea lea e tineia ai le agaga o lena Tulafono o le Faavae.

Lau Afioga i le Fofoga Fetalai, talofa e, talofa e i saunoaga mai lena Itu, i le tou alolofa, ua matuai momomo outou finagalo i lau faalogologo atu i lo outou alolofa i tamaitai. Talofa e i tamaitai o le a vaea, noatia lo latou faamoemoe.

Lau Afioga i le Fofoga Fetalai, o tamaitai ia e i totonu o le Maota, o matai. Ma o e foi e fia tauva, o i latou foi o matai, e pei foi o outou o tamatane, vaeane outou itu tetele ma itu taulagi. Aua o le agavaa autu lena e ofi mai ai le tagata i totonu o le Maota lenei. Ma afai foi i le Teuteuga lenei, o lea ua avatu ai le faatu e tolu tausaga e tataua ona fai ai le tautua, leai o le tautua lava lena a le matai tamaloa ma le matai fafine. Ae ou te fia tautala lau Afioga i le Fofoga Fetalai, se i tatou suesue lava le mataupu lea faapea ua avea le Toe Teuteuga lenei o le a noatia ai sui tamaitai, ona tatou o lea i le Tulafono o le Toe Teuteuga o le Faavae, lea ua faamautu ai le lima o Nofoa mo tamaitai.

O le uiga o le Tulafono lea pe a faapea o lea lava e le i malamalama i ai le toatele o le Maota lenei, o le faiga faapitoa, special nature, ona o le a? Ona ua faamautuina pea le mau, o le Pasefika, o le itulagi lea e aupito mauualalo sui tamaitai o lo o i ai i totonu o upufai o Malo. Ma o le faitau a Malo Afaatasi, o le pau o le fuainumera o tamaitai i totonu o upufai, o le gugu foi lea, leai se leo o le afa o le atunuu pe sili atu foi i le afa o le atunuu i tonufai a se atunuu.

Lau Afioga i le Fofoga Fetalai, ne i te i ua tala atu tele i tua le faamatalaga, ae tatou toe foi mai lava i le Tulafono o le Toe Teuteuga o le Faavae lea na momoli mai e le Afioga i le Palemia.

Afioga Hon Palusalue Faapo II: Lau Afioga i le Fofoga Fetalai o se mea e fia malamalama ai.

FOFOGA FETALAI: O le a tuu atu le avanoa pe a maea mai le saunoaga a le Minisita.

Afioga Hon FIAME NAOMI MATAAFA: O le faiga faapitoa, ina ia le pau ane i lalo i le lima Nofoa e umia e tamaitai.

FOFOGA FETALAI: Malie lau Afioga i le Minisita se i tuu atu le avanoa i le faauilavea a le Taitai o le Itu Agai.

Afioga Hon Palusalue Faapo II: Ioe ua ou fiu lava e faalogologo atu i le saunoaga a le Afioga i le Tamaitai Minisita i le upu lea o le talofa e, ua fiu lava e faalogologo atu po o le a tonu le uiga. Ae na ala ona taua e au ma lenei Itu, ona o tamaitai foi ia na Teuteu ai le Faavae, o loa nai tamaitai e fai suafa matai pei ona laga atu e lenei Itu mo le faamoemoe e o i le faiga palota ona o le Teuteuga lenei o le Faavae. Ae paga lea o lea ua aumai nei le Tulafono Tau Faaofi lenei, e tolu tausaga.

A o le tulaga i le tautua pei ona e saunoa ai, pei ona saunoa foi le sui usufono mo Aana Alofi Nu.1, Afioga Hon Leaupepe Toleafoa Apulu Faafisi, o le tautua e fai mai lava o tatou laiti, taulelea, se i oo ina matai. O lea la o le a le ... e pei o le agaga a le United Nations ma Faalapotopotoga uma na, tele tupe ua sasaa mai ina ia faataunuina le tatou Teuteuga o le Faavae lea, ina ia atoa le 10pasene pe i luga atu o tamaitai.

Na pau lava lea o le mea na ou laga atu ai lau Afioga i le Fofoga Fetalai.

FOFOGA FETALAI: O lea ua ou maua le finagalo o le sui usufono, o lea e manino lava le faamalalamamaga. O lea faatoa uma atu nei lava i le faamalalamamaga a le Minisita. O le sui tamaitai, e moni lona agaga e alu i le faiga palota, o lona uiga e le o se mea faatoa mafaufau taeao. Afai sa tautua

mai lava le sui tamaitai ma le tina i le nuu i le olaga atoa, o lona uiga o le mea ua leva ona toto i lona loto e alu. Ae aua ne i faaosofia moegaluaga i se taimi puupuu. O lea e manino le faamalamalamaga a le Afioga i le Minisita, o se tina o lo o i ai lona loto atoa e alu e tautua le itumalo. O le manino ia o le mea lea na aumai mulimuli e le Minisita, o le tagata e fuafua e alu i le faiga palota, o se tagata ua atoa lana tapenaga, e le tau ina oso ina ua sui le Faavae. E le tau ina oso ina ua maua le avanoa lona lua ona o le faiga palota. E leai, ua manino le faamalamalamaga a le Minisita, o se tina, a lea ua e saunoa manino lau Afioga i le Taitai o le Itu Agai, o le tagata e tautua mai lava o lailaiti. E leai la se mea tatou te popole ai ia i latou o tautua moni, o latou na o lo o atoa i ai le avanoa. A o nisi o tina ua faaosofia moegaluaga i le taimi lenei, e le uma le faiaso a le Alii, e amata atu nei, o le isi Paeaiga ma le isi Paeaiga maua le avanoa ona manino lea. Ne i tatou toso le lauu felefele ona umi lea o le tatou mataupu, a o lea ua manino le faamalamalamaga.

Tulai mai lau Afioga i le Tamaitai Minisita.

Afioga Hon FIAME NAOMI MATAAFA: Lau Afioga, o le faiga faapitoa la lea o le tatou Tulafono, ma e na o le pau lava lea o le faiga faapitoa mo tamaitai. A le atoa le tolima o tamaitai e nofoia le Maota Faitulafono, ona toe faagasolo loa lea o le vaaiga a le Ofisa o Faiga Palota e oto mai tamaitai o ē sa tauva i le faiga palota e faapoo ai Nofoa ia maua le lima o Nofoa. Na o le pau lava lona o le faiga faapitoa lea e fai mo tamaitai. O lona uiga, a tatou fai se upu foi lea tau faigofie, e i ai le avanoa lona lua mo sui tamaitai pe a faapea ua le maua le lima o Nofoa i totonu o le Palemene. A o isi agavaa uma ma isi tulaga uma e fuafua ai a tatou faiga palota, e tutusa lelei tane ma tamaitai.

Afioga Hon Palusalua Faapo II: Lau Afioga i le Fofoga Fetalai, o se mea la e fia faamalamalama.

FOFOGA FETALAI: Se i uma ona tuu atu lea o le avanoa.

Afioga Hon FIAME NAOMI MATAAFA: O le uiga la lona lau Afioga o le Tulafono lea, lea e maua ai le avanoa lona lua pe a faapea e le o atoa Nofoa. A o le faamoemoe lava ia, e le tau manaomia le Tulafono. A uma le faiga palota e foi mai e 10, 20, 30, 40, 50 tamaitai e sao mai i totonu o le Maota lenei, e leai se mea e faaoga ai fua le Tulafono. A o le faamoemoe ma le tapenaga a le Malo na sui ai le Faavae, ina ia iloa atu le siufofoga o tamaitai i totonu o le Maota lenei. Aua o le mea na aliali mai i le va o le palota 2006 ma le 2011, e 50% na pau ese ai sui tamaitai i totonu o le Maota. A faaauai ai lava la le tulaga lona, e alu alu lava, e mafai ona tatou faapea, ua le toe sao mai tamaitai i totonu o le tatou Palemene. Aisea?

Lau Afioga i le Fofoga Fetalai, e ala ona ou fai atu, talofa e, ona o lea lava e faamau lelei i lou mafaufau saunoaga ma upu i totonu o le Maota lenei ina ua fai le Tulafono lea o le Suiga o le Faavae. O a saunoaga? E le o se tofi lea o le tamaitai, upufai. A omai i totonu o le Maota lea a o ai e faasusua pepe? O le a le mea e tau mai ai i saunoaga ma upu ia? E tau mai e sui usufono o le Maota lenei o sui usufono Faitulafono, o tagata e vaaia aiatatau a tagata uma o Samoa, e le o se mea lea mo tamaitai.

Afioga Hon Palusalue Faapo II: Lau Afioga i le Fofoga Fetalai...

FOFOGA FETALAI: Onosai mai lau Afioga i le Taitai o le Itu Agai o lea o le a uma ona avatu lea o le avanoa.

Afioga Hon FIAME NAOMI MATAAFA: Talofa e, lau Afioga i le Fofoga Fetalai....

Afioga Hon Palusalue Faapo II: Ioe, talofa e i lou tutu soo atu...

Afioga Hon FIAME NAOMI MATAAFA: Ua saunoa soo mai lau Afioga i le Fofoga Fetalai, e le level le playing field... A faa-Samoa, e le laugatasia le malae lea tatou te taaalo ai ona o le suiga lea. A o ai na e fesili i ai lau Afioga i le Taitai o le Itu Agai e level se playing field? Aisea? Ua faamauina saunoaga i totonu o le Maota lenei, e le o se tofi lena mo tamaitai.

FOFOGA FETALAI: Malie lau Afioga i le Tamaitai Minisita, se i tuu atu muamua le avanoa i le Taitai o le Itu Agai ona avatu lea o le avanoa leaga o lea.... Palu.

Afioga Hon Palusalue Faapo II: Faafetai. E ese le matagofie o lenei taeao o lea ua faamaoti mai tulaga o le Minisita, o ia foi lea e taitaia faatosina ina ia toatele tamaitai e o i le palota. O la e faalogologo mai tina, o le ala lea o le matou tutulai atu ona o le Tulafono Tau Faaofi lea ma le agaga o le Malo ina ia toatele sui tamaitai e o i le faiga palota, e matua feteenai lava. O le isi lima ia toatele sui tamaitai, a o le isi lima, e tolu tausaga le tautua a nai tamaitai.

O le uiga lena o lau upu talofa e, o le uiga lena o lau upu. E ese le feau la e ave e faatosina tamaitai ia toatele e o i le faiga palota, ese le... O le mea lena ua ou tulai atu ai. A o le isi mea lea o le faasusu o le pepe ma mea faapena, e leai e le maua ai se ai i lena mea, e le maua ai se toatele o ni tamaitai e o i le faiga palota. Ma lou faaaloalo lau Afioga.

FOFOGA FETALAI: O lea ua maua lou finagalo. Lealailepule.

Tofa Lealailepule Rimoni Aiafi: Faafetai i lau Afioga. Ona o le vaega lea, e fai si mamafa o le saunoaga lea faapea o au e leai se upu e lafo i le Palemene lenei ou te le manatua. Ou te talitonu o le taimi na talanoa ai le mataupu lea, e leai se upu faapea na lafo e aua le omai ae o e faasusu pepe. E tataua ona aveese lea upu. O le faasusu o le pepe, o le mea o la e promote e le Health, o se mea lelei.

FOFOGA FETALAI: Ne i atugalu le sui usufono, e le i taua lou suafa Lealailepule. E le i saunoa le Minisita o oe na e saunoa i le mea lea. E faamalulu foi i sui usufono, ou te manatu lava o lo o manino le mataupu, e leai se mea e ono faia ai se faafinauga, o le finagalo o le Afioga i le Minisita lea ua faataatia. O aulape ma mea o le Tulafono e puipui ai nisi o faafitauli e tulai mai mo le lumanai. A o lea ua manino, o le tagata e alu, o le tagata e atoatoa. Ua faalua nei ona ou faamalamalama atu le mea lea. E le o punitia le avanoa mo tina e o, ae ia faamalieina aiaiga tulafono o le tautuaina o tatou nuu ma alaafaga. Lau Afioga i le sui usufono mo Faasaleleaga Nu. 4.

Afioga Peseta Vaifou Tevaga: Lau Afioga i le Fofoga Fetalai.....

FOFOGA FETALAI: Ia se i tuu atu le avanoa i le Malo.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga i le Fofoga Fetalai, se i malolo tasi foi le Minisita, se o le matua manaia o le fefaaliaiga o taofi i leni taeao, ua tele lava nai mea fou ia ou te faalogo atu i ai. O le mea moni, o le lalolagi lea ua tatou i ai, ua ese le mea lea ua agai i ai le lalolagi. E i ai le mea foi lele i le Faaperetania o le ‘chain the balance,’ o manatunatuga fou ia e lagolago i mea o aiga fealofani, ina ia fealofani aiga, e fesoasoani foi le tama ia i le galuega a le tina. O le tele ia o mea ou te faitau ai, o le isi lea galuega a isi tama, o le faasusu o pepe. O le Tulafono lea ua i ai nei, e i ai taimi o lea foi ua amata ona agai tatou i le tulaga foi lele ua amata ona talanoa isi, e tatau foi ona fai ni paternity leave, e le gata ina fai maternity leave i tina foi ia ua maitaga o lea e tolu masina o nonofo i le vaaiga o a latou pepe, ae tatau foi ona fai ni tolu masina e malolo ai le tama ia mai le galuega e alu e vaai le tina ma fesoasoani i le faasusuina o pepe ma le tata o napekini.

Ia pei o le tulaga lena leaga o lea e fetogiai pea mea ia i totonu, a o le mea lea ua tupu, e ese le lalolagi lea ua tatou i ai. Lau Afioga i le Fofoga Fetalai sa i ai le...e toatolu fafine mai le Malo Afaatasi na omai ia te au i le mea lava lea o le palota, na faatalatalanoa e i ai le fono sa talanoa ai, na ou fai i ai le upu i le mataupu o le chain the balance, ia sa fai ai la tautalaga. Ona sau loa lea o le isi tina o le toatolu lea fesili mai ia te au; ‘A alii Tuilaepa, o le a le mea ua le faia ai sa outou Tulafono e pei o Tulafono la e fai e le Malo o Farani e faatulaga ai pasene o nofoa o le Palemene, ina ia mafai ai ona faigofie i tina ona omai i totonu o le Palemene? Ia ona ou fai lea i ai, e le faapena le Faavae o le Malo o Samoa. O le Faavae o le Malo o Samoa, e matautia le atamamai o toeiina na latou fausia le Faavae. O la e faatafagaloa ia le Faavae, e le o faapea mai o le pasene lea o tamaloloa, o le pasene lea o tina, e leai o la e faatafagaloa. A alu alu lava ua selau pasene ua tina uma le Palemene, o le mea lena...ua lava loa la o lea ua i totonu, o lea e i totonu o le Faavae, e mafai ona selau pasene tamaloloa, e mafai foi ona selau pasene ia tina, e le o faatapulaaina ia tina. O le faiga lea e alu ai tatou, ou te lagona ou te le iloa po o ua faafia ona fai le...e tulaga ese le mea lea e i ai tatou, e le o fai e pei o isi atunuu, e matua tapu lava ia tamaloloa e omai mai se itumalo, ae na o fafine, leai e le o faia lena mea. O le mea la lena na ona faapea mai, o sui ia e tatau ona omai i totonu, ae a faatino le mea lena, e tatau pea ona paleni le tauvaga, paleni, aua ne i faia pei o le mea la e fai i isi Malo e faapea mai, ia o itumalo ia e lima, o le a na o tina e omai ai, e le o.....mai tina e leai. O lea lava e alu i luga o le Faamatai ma le saolotoga, e fai ai le faaiuga saoloto e i latou o ē e palotaina tofi, e le o faatulaga faapena. Aisea? O le mafuaaga, i faiga ia o lo o fai i isi atunuu, ua iu ina toe mumusu ai tina e omai i totonu o le Palemene i le mea lea o le tofi sao, po o le tulaga o le faatulaga na o tapu lava i tamaloloa e omai i ni itumalo e sao mai na o tina mai itumalo na, ae na o tatou e i ai le faiga lea – ma e faigofie ona fai le faiga lea, ona o lea e fetuunai ia le maualuga o nofoa o le Palemene i le suiga o le Faavae, e faigata i isi atunuu ona latou faia mea ia ona teuteu le Faavae, ae faigofie ia tatou ona o lea e i le itu e mautu tonu e fai ia le malosi, e le o le itu lena e le mautu ai ni mea. E pei la o le tulaga lena lau Afioga, o lea ua fevesiai ai i le

taeao nei, a o le manaia ia o le Tulafono, o lea foi e faamaalo iuofe le Minisita i le matagofie o le mea lea ua tatou i ai pei o tulaga o le faataoto o aiaiga, aua e leai lava se atunuu e faatafagaloa ia mea faapea, e i ai puipuiga, ae i puipuiga ina ia tulai mai sui usufono, e le o ni sui usufono e maua i le mea foi lele sa maua ai sui usufono i le amataga, na ona uma lava ona fai le palota e sue atu ua o i fafo, ua o i fafo e le toe omai, e faatoa toe omai foi ina o le a fai le isi Faiga Palota. O mafaufauga la ia e teuteu ai a tatou Faiga Palota, e le faapea o ni mafaufauga na tutupu ae nei, ae faavae i luga o faaletonu ma le anoano o faaletonu na tatou vaavaai i ai na tutupu i Paeaiga i aso ua tuanai, ona o le filifiliga saoloto o mea sese e fai, le filifiliga saoloto foi lea na fai foi e Atamu ma Eva, lea ua faapeaolaina ai tatou. E iloa lava le mea e tatau ona fai, ae filifili lava le mea valea e fai. O le ala foi la lena o lea e tele ai lauga ia fai mai, o, e matagofie le mea lea, a o lea e tatou te iloa lelei lava e faavalevalea le taofi. O mea ia e avatu e le Malo lea e saunoa i ai le Minisita, o le puipuiga o a tatou faiga filifiliga, ina ia tulai mai sui mai itumalo, o sui e loloto a latou tofa e manuia ai le atunuu i ni a latou faaiuga fai e alu atu i totonu o le Palemene lenei.

Lau Afioga i le Fofoga Fetalai, ia o si au fagogo lena i lenei taeao e faanofofilemu ai le tatou Maota.

FOFOGA FETALAI: Ia e manatu ua manino ma malamalama. Le sui usufono mo Faasaleleaga Nu. 4.

Afioga Peseta Vaifou Tevaga: Lau Afioga i le Fofoga Fetalai, ia o lea ua faafofoga i le saunoaga foi a le Afioga i le Palemia. A o ou manatu uma lava na na ou manao e avatu ae e taofia maia, o lou manatu, ia leaga o lea e usitai foi lenei sui usufono ona ua e saunoa mai o lea e sausaunoa le Afioga i le Minisita e uiga i le Tulafono, a maua se avanoa ia ona toe tulai atu foi lea.

O le mea lea e tatalo atu ai i lau Afioga i le Fofoga Fetalai, e manaia ae taofi loa le Itu Agai e aua le toe tutu mai i luga ae se i sausaunoa le Afioga i le Minisita, ma lou faaaloalo lava.

FOFOGA FETALAI: Ia o oe le isi faalavelave lea e te faalavelave soo.

Afioga Hon Palusalue Faapo II: Lau Afioga i le Fofoga Fetalai o le mea e fia faasao.

FOFOGA FETALAI: Ia lau Afioga i le Taitai o le Itu Agai.

Afioga Hon Palusalue Faapo II: O le Tulafono Tau Faaofi o le latou Tulafono, e le tatau ona tutulai mai sui usufono ia e faasao e alaala ane i lalo, a o le aiatatau a le Itu Agai e tutu atu i luga faamolemole lau Afioga.

O le isi mea o lea na laga nei e le Afioga i le Palemia, sui usufono foi ia o la e o nofonono mai fafo, pei o le sui usufono lea mo Alataua Sisifo. Po o sao nei mea o lea ua tolu aso? Ua tatau ona faatea ma le Palemene.

FOFOGA FETALAI: O lea o le a ou tali atu.

Afioga Hon Palusalue Faapo II: I, aua o la e manatu le itumalo o lea e fono.

FOFOGA FETALAI: O lea ua oo mai le...e te le o maua foi, ne i tauleagaina le sui usufono mo Alataua Sisifo, o mea faale-Itumalo lea na oo mai ai lana faanoi na oo mai, o se sui usufono matapoto tele le alu e fagota i fafo atu, ua fiu si tama e mauulu mauulu iinei e tou te avea uma mea. O le ala lena e faamalulu leaga o la e faafogafoga mai le itumalo, leai, na oo mai le faanoi a le Afioga i le Minisita, o tiute faale-Itumalo o lo o tuua ai lo tatou atunuu, ma ua uma ona faanoi aloaia i le tatou Fonotaga.

Ia tulai maia lau Afioga i le Tamaitai Minisita.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, faafetai foi i le Afioga i le Taitai o le Malo ua faalauaitele le tatou mataupu i le tatou Tulafono e suia ai le Faavae ina ia mautinoa ai le i ai o se siufofoga o tamaitai i totonu o le Maota.

Ae i lau Afioga i le Fofoga Fetalai, e faaauau pea sau tautalaga i le upu foi lea talofa e, ioe, talofa e i le alofa o le Taitai o le Itu Agai ma lena vaega i tamaitai.....Ia o le a la le tau o le au tamaitai ia e pale mai? Fasi faipule. Ioe. Ia o le upu lava ia e leaga le upu, ae a suesue i le loloto, o le mea lena e faigata lau Afioga i le Fofoga Fetalai, aua o le mea lea e tautala mai ai i le gagana lea, faailoga tagata, faailoga tagata, aua o le autu o le faailoga tagata, e le talia tamaitai ona o latou o tamaitai e le o so latou tofi le fai tonu.

Tofa Levaopolo Talatonu: Lau Afioga i le Fofoga Fetalai, se faamolemole o le mea e fia faasao.

Lau Afioga i le Fofoga Fetalai leaga o lea ua faafogoga le atunuu i le tuuaiga lea.....o le sui usufono mo Siumu na faia le.....

FOFOGA FETALAI: Malie o lea o le a uma ona avatu lea.

Tofa Levaopolo Talatonu: Ioe, lau Afiogai le Fofoga Fetalai, e le o matou na faia le upu lea o le fasi faipule. Talofa e i nai tuafafine.....o le sui usufono mo Siumu na faia le upu o le upu a latou.

FOFOGA FETALAI: Taatia mai, se i saunoa le Afioga i le Minisita.

Afioga Hon FIAME NAOMI MATAAFA: Po o le sui usufono mo Siumu, a o le tou vaega uma lava na e nonofo mai i le itu lena, ioe. A faapea ua pipisi atu ai ma le sui usufono mo Siumu, ai ona ua nofo si toeaina i ina i le tou pito ma le leaga o le agaga lea talofa e, ioe.

FOFOGA FETALAI: Ua tatou taunuu i le tatou taimi malolo, o le a faataatiaese Taulumaga a le Fono Aoa o le a faaauau pe a uma mai le tatou malologa o le taeao.

E faasilasila atu o le a faataatiaese Taulumaga a le Fono Aoa mo lana malologa masani o le taeao.

Na faataatiaese Taulumaga a le Fono Aoa mo lana malologa masani i le itula e 10:39 i le taeao ma toe faaauau i le itula e 11:26 i le taeao.

FOFOGA FETALAI: E faasilasila atu ua toe amatalia nei Tualumaga a le Fono Aoaofa Fautulafono.

E talitonu o lea ua maea le tatou malologa pei ona feagai ai le tatou Palemene. E i ai foi le agaga maualuga ua maua se faasiliga malosi. E pei lava ona faatalaauula atu le Fofoga Fetalai i le taimi ua sola ma le taeao analeila, onosai mai le tatou Palemene e manatu o le tatou Fono faaauau lenei seiloga lava e uma le tatou polokalame. O taeao le tatou Sauniga Lotu e pei ona faasilasila atu. E i ai la le talitonuga ua matu i fau le taliga o le sua ma le tautega ua maua la outou faasiliga malosi. E momoli atu ai le agaga faafetai tele i le onosai mai o le tatou Maota i lenei itula o le aso o lea ua tatou taunuu i le afa lona lua o le tatou galuega.

E faia le tatou malologa o lo o sausaunoa le Afioga i le Minisita e ana le Tulafono Tau Faaofi, ma e manatu foi ua manino ma malamalama tuleiga ma saunoaga sa outou saunoa i ai. O a foi ni tulaga sa aafia i saunoaga, le paia e ma le mamalu o le Maota, e le o ni ai e avea pe a faapea foi o ni saunoaga ma ni tuleiga ua aafia ai se finagalo o se isi po o se suafa o se isi. E maitau atu ia o outou lava o Tootoosinasina e le soona gae e le soona te i vave foi, o outou o tagata matutua e le tau fai atu foi e lava le tofa ma le faautautaga. Ua leai lava se vaipanoa tou te le i oo i ai o le lagi ma le lalolagi lenei tatou te taamimilo ai. Ia ona manatu lea tuu pea le avanoa i le Afioga i le Minisita e sausaunoa ai.

Ae le i avatua le avanoa ou te tapa le Afioga i le Palemia mo le lafo o le tatou galuega.

LAFO MO LE SUIA O ITULA FONO

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faataatiaese Tulafono Tumau 31(1) e avanoa ai le sua o itula Fono i le aso. O itula Fono nei i le taeao; 9:00 i le taeao faamuta i le 1.00 i le afiafi, ona toe faaauau ai lea i le 7.00 seia oo lava ina maea tatou Tulafono Tau Faaofi i le Pepa o Galuega.*

Faaluaina e le Sui Palemia, Minisita mo Faamasinoga ma Pulega Tau Faamasinoga ma le Minisita mo Galuega Tau Alamanuia ma Atinae a le Malo.

Na faamaonia le lafo.

Na toe faaauau felafolafaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu.3) 2015.

FOFOGA FETALAI: Se i tulai mai le sui usufono mo Siumu.

Tofa Hon Tuuu Anasii Leota (Siumu): Faafetai mo le avanoa lau Afioga i le Fofoga Fetalai. Ua ou tulai atu e molimoli atu le faafetai tele i lau Afioga, lea foi ua maea le taliga o le sua i le paia maualuga o le Maota nei, ou te manatu ua maua foi se faamalositino aua le faaauauina o le tatou Fonotaga. Ae na o si vaega itiiti lea ou te fia tulai atu e fia faasao ona e talitonu e matuia

le tuuaiga lea ua tuuina mai faapea na ou lafoina lea upu, talofa e i si fasi faipule. Lau Afioga o lo o molimau lava Hansard e leai se upu e leai foi se taimi na ou faia ai se upu faapea. O lo o manino foi a faapea o le upu lea e tau aumai, sa manino lava la faaaliga i totonu o le Maota lenei, “fai mai upu o le faleaitu a Petelo ma Sumeo.” O lona uiga o upu a Petelo ma Sumeo ae le o se upu a au ma lou faaaloalo.

FOFOGA FETALAI: Ia, a e toe manatu lava i taimi ua sola ua galo foi na mea e le o toe manatua e se isi lena upu na e saunoa i ai, ae sao a oe e te le i saunoa i se upu lea na tuu atu ai tuuaiga a le Afioga i le Minisita. E ui o lea ua manino lea vaisua e le tatau foi ona toe atugalua i ai le Afioga i le Tamaitai Minisita.

Tulai mai lau Afioga i le Minisita e faaauau le saunoaga.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai ua matu foi i fau le taliga o le sua a sui usufono o le Maota. E momoli atu ai le faafetai tele i lau Afioga ma le tatou Matagaluega nei i le tapenaga aua le malutaeao. Ua maua foi le malosi e toe faaauau ai le tatou galuega e tali atoatoa atu i saunoaga ma fetalai foi a le Maota i le tatou Tulafono Tau Faaofi.

Lau Afioga i le Fofoga Fetalai, e fai le tatou malologa o fai pea lau tali atu i se mau e faapea, ua avea lenei Toe Teuteuga e fai ma noataga pe taomia ai le avanoa mo tamaitai e tauva ai i le faiga palota. Lau Afioga i le Fofoga Fetalai, o lena ua uma atu le faamatalaga i le laga mai foi o le tatou Tulafono Tau Faaofi lea na tuuina atu e le Faigamalo lenei e faamautinoa ai ia le i lalo ifo o le 10% sui tamaitai mo le Maota. Na fai lena fuafuaga i le agaga lelei aua o lea foi na saunoa le Taitai o le Itu Agai e le o laugatasia le malae lea tatou te taalo ai i le taaloga o faiga palota. It's not a level playing field. A o lea foi ua tali atu lau Afioga i le Fofoga Fetalai e sao lelei lava le Taitai o le Itu Agai, e le laugatasi le malae lea tatou te taalo ai mo le itupa o alii ma le itupa o tamaitai. E le laugatasia ona o ni Tulafono ae laugatasia ona o talitonuga o o tatou lava tagata. O le talitonuga o le itupa o alii, e i ai foi tamaitai e faapea, e le o se tofi mo tamaitai le tofi sui usufono, ma e le o se mea laititi le mea lena lau Afioga i le Fofoga Fetalai ma le mamalu o le Palemene. Aua po o le a le taumafai atu o Tulafono pe faaoga faa-auupega e taumafai ai se faafitauli o lo o tulai mai i lea taimi ma lea taimi. A o le lūina o lagona moni ma lagona loloto o tagata, ou te fai atu pea le upu o le lagona faailoga tagata o le mea lena e faigata ona lui. O le mea lena lea e faafeagai ma tamaitai, e le na o tamaitai Samoa, ae o tamaitai o le lalolagi atoa, power, pule, authority. O le a? Fai mai o le matafaioi lena a le itupa o tane. Ia ou te manatu lau Afioga i le Fofoga Fetalai e le o i ai sou faamoemoe faapea ou te finauina le mataupu lena aua o le tagata ma lona ia lagona. A o le tatou Tulafono faavae lea na saina aao i ai o outou tuua ma o tatou matua, aumai le avanoa o le aiatatau mo tagata uma. E i ai le upu foi lea ua ou faalogo soo i ai e tumau faavae ae sui faiga, tatou aumaia i le tatou Tulafono Tau Faaofi lenei, taofiofi lava le iumaea mo le faa-matai. E sui lava a tatou faiga e faatatau i le taimi ma le tau. O lea foi ua saunoa ia nisi o sui usufono e faapea mai, ioe o lea na tatou amata i le faa-matai a o lea foi na tatou suia. O le 1991 tatala atu le palota i tagata lautele i le 21 tausaga ae sa tumau lava, o lea lava e tumau le tulai mai o matai e avea ma sui tauva.

FOFOGA FETALAI: Malie le Afioga i le Minisita se i tuu atu le avanoa i le Afioga i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, o le mea lea na ou toe tulai atu ai ona ou te talitonu ua faailoga tagata le Tulafono Tau Faaofi, aemaise lava i tamaitai. O lea ua pasia loa le Teuteuga o le Faavae i le 10% lea ua o loa nai tamaitai fai matai. E oo atu la ia Mati e le i atoa le tolu tausaga. E tasi la lea faavaatua i le naunautaiga o le Palemene ma le tatou Tulafono lea ua pasia, e faavaatua ai sao o nai tamaitai ina ia avea ai ma sui faatutu. O le a le mea e tuu i ai lea tolu (3) tausaga? Ae le gata i lea, o le a le mea ua faatatope ai i lenei Paeaiga ae le se i amata lelei i lea Paeaiga ona fai lea o matai e fuafua ia atoa le tolu(3) tausaga.

O le mea lea lau Afioga lea na avatu ai sau faamatalaga aemaise o lenei Itu ina ia silasila totoa i ai. Why three years? A o lea ua saunoa isi sui usufono, e amata mai lava i lalo e tau i luga seia avea oe ma sui usufono. O le mea lava lea o lea e tulai atu ai lau Afioga.

FOFOGA FETALAI: O lea ua maua atu lou finagalo o lea foi e maitau le Nofoa i le faamalamalamaga ua uma ona aumai e le Minisita. Ou te faamalulu atu foi i le finagalo, o le finagalo lava lea o lau Afioga i le Taitai o le Itu Agai, ma e manatu foi o lea ua faafofoga, masalo o lea ua sautualua, sautuatolu le saunoaga a le Palemia i le faataua. Ou te manatu ua manino ma malamalama lea mataupu. Palusalue, lau Afioga i le Taitai o le Itu Agai, o lea ua logona lou finagalo o lou lava lea finagalo ma lenei Itu, a o lea ua folasia le finagalo o le Malo o le tolu tausaga o puipuiga ia agai i le Tulafono Tau Faaofi. E le o nei, maybe not today a o aiaiga mo le lumanai ina ia puipui tulaga nei. O lea ua manino ma malamalama le faamalamalamaga a le Minisita manino foi le faamalamalamaga a le Palemia, tulai mai lau Afioga i le Minisita e faaauau le saunoaga.

Afioga Hon FIAME NAOMI MATAAFA: Lau Afioga i le Fofoga Fetalai, e faaauau atu le manatu e tumau faavae ae sui faiga, ona alu alu foi lea o le tatou faigamalaga i le 1991 lea na fai ai tatou suiga ia o tatou faiga palota, tatala atu i le lautele o le atunuu le palota ae tumau pea sui usufono o le Palemene i ē e suafa matai.

Lau Afioga i le Fofoga Fetalai e le i faailoga foi po o le sui usufono alii po o le sui usufono tamaitai, o le matai lava. E faapena foi le Tulafono Tau Faaofi lenei aua o lea ua saunoa ma tagisa, tiga alofa le finagalo o le Taitai o le Itu Agai i nai tamaitai ae ou te faamanatu atu, e leai e faapena foi mo alii, e le na o tamaitai. E leai foi se mea o le a suia ai fua le agaga o le Teuteuga i le manaomia o tagata ua mautu le latou tautua i totonu o nuu ma afioaga, pe alii pe tamaitai ae o le agaga lava ia o le Tulafono Tau Faaofi, o le ituaiga sui usufono lenei lea e moomia, e lotea upu o le tatou atunuu.

O le aumai o le Toe Teuteuga ma faapea mai o lea ua tapena i ai tamaitai ona o le Tulafono Tau Faaofi lea, oi, o le suafa matai o suafa o aiga. E le nonofo nonofo lava aiga fai a latou filifiliga faapea, fai ni a tatou matai e maua ai ni tatou sui usufono e o. E leai, e fai matai ina ia tausi le aiga ma tautua i le nuu ma le Ekalesia. A o le lalolagi lea e aumai i le saunoaga a le Taitai o le Itu Agai, e pei e foliga mai na o le aumai lava o le sei o le matai ae le taua le agaga o le Tulafono Tau Faaofi lea e faatulai atu, ma tau ai lava

tamaitai. Pe ua leai ea ni tamaitai o lo o suafa matai o la e nonofo nei ma tautua i totonu o Itumalo? O le fuafua foi a le tagata i le tofi lenei e fuafua mamao. Ioe, ae pei o le mea e ilitata i ai lau faalogo o le faapea, talofa e, o tamaitai ia na o le oso lava i luga o le fua ona o lea ua i ai le Tulafono Tau Faaofi. E le o le agaga lena o le Tulafono Tau Faaofi lenei.

O le agaga o le Tulafono Tau Faaofi i le suiga o le Faavae ia le mou atu se avanoa e lagona ai le siufofoga o tamaitai Samoa i totonu o le Maota e fai ai upufai o le tatou Malo. A o le aumai o mataupu ia i le auala o lo o aumai ai, se talofa lau Afioga i le Fofoga Fetalai. Na ou mafaufau lava po o le a le upu e faamatala ai lou faalogo atu i le feau lea e aumai, ua avea lenei Tulafono Tau Faaofi e noatia ai avanoa o tamaitai. E tautala galuega lau Afioga i le Fofoga Fetalai i upufai. Silasila le Maota lenei, e fia tamaitai? E toatolu. O fea le Itu lea e nonofo ai? O lea, Itu a le Malo. E fia tamaitai na e nonofo mai i ina? E leai ma se tamaitai o tulai mai i ina. O fea la le tino...talofa e i tamaitai ua noatia o latou avanoa...

FOFOGA FETALAI: Malie lau Afioga i le Minisita se i tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, o lea ua agai sese le mea ua saunoa i ai le Afioga i le Minisita. O le mea muamua, na teuteu le Faavae ina ia saofaga le 5 o sui usufono, le 10%. O lona uiga, tatou te taumafai ina ia saofaga le mea lea. O le a le mea e taumafai iai? O Tulafono nei e aumai ina ia maua ai le avanoa o tamaitai i le faiga palota e fai ma sui faatutu. A o le a le mea lea ua matau atu i ai? Ua leva lava ona taatia le tatou Faavae sa i ai, ae le i faaosofia tamaitai e fia o i le palota lea e teuteu ai nei le Faavae. O lea la ua faaosofia ua fia o loa e avea ma sui faatutu, fai loa o latou matai. E sao le Afioga i le Minisita o le matai e le o se mea foi lele, a o lea ua tatou iloa i aso nei. E le mafai ona taofiofia e aiga pe a i ai ni tamaitai e fia matai, a o lea la ua faatu le Tulafono Tau Faaofi lea. Ma o le upu moni lava, ua taofia, po o fea lava, pe toatolu. O le mea lea ou te faanoanoa ai i le tutu mai o sui usufono tamaitai lea na tutu mai ananafi, e foliga mai ua limataitaiina ma faapea, faafetai i le Tulafono Tau Faaofi. Oi a faafetai i le Tulafono Tau Faaofi e aafia ai tamaitai?

FOFOGA FETALAI: Malie Palusalua, o lea ua maua lou finagalo. E pei o le agaga lena, o lea foi tatou te.... Malie Lealailepule, malilie o lea o le a fai lau faaiuga i le mataupu lenei, ma e iu lava ina oo i le tulaga lea ona o lea e tagatasi. Na ou fai atu, o lou finagalo lena Palusalua ma lena foi Itu o le tatou Maota. O lea foi o le a toe sauni mai le Minisita e toe tali lava le mea lea e tasi. O fuafuaga a le tatou Malo, silasila foi i le manatu autu lea e aumai, e le o nei, e le uma ai foi o isi faiga palota. A faapea e i ai se tina e aafia ona o le Tulafono Tau Faaofi lea, e le uma le faiaso. E le gata i tina a o tama foi o lo o taumafai, a ia faatino le aiaiga ua na o tagata e o e tautua lelei i le nuu, tautua maopoopo, tautua atoa, ae aua ne i tatou o i le mea lea o le pa ma oso. O le a le mea e tupu? Na o le pa lava mou, uma le palota pa mou, e leai se isi e toe sau.

O le agaga la lea e tau avatu nei, lea ua manino, malilie sui usufono, o lea ua manino le faamalamalama o le auaunaga ma le finagalo o le Minisita ma le Tulafono Tau Faaofi, afai ua tatou sui, sui i mea lelei, sui i mea atoatoa ina ia

atoa ma lelei agavaa o sui o le a o i le palota. E le gata i le... leaga o lea o le a tatou faapitoaugafa i tina, ae o lea e manino le Tulafono Tau Faaofi, e faapena foi le itupa o tama. O tagata o le a sauni e o i le palota, o tagata ua atoatoa lo latou finagalo ma le valaauina, a malie i ai le aiga, malie i ai le nuu, ae a lena ua outou nonofo ma le tali? O la e iloa lelei e nuu tagata faatoa o atu i le palota. Ua silafia e i latou e palota i ai ona o le tautua. A o lea ua manino ma malamalama le finagalo o le Minisita lea e tau faamalamalama.

Se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, malie lau Afioga, o le mea lea ua umi ai le tatou Fono, a na saunoa sao le Minisita e tali fesili ia sa laga e lenei Itu, a o si ona pona o lea ua toe lauga faalauaitele ma pei e agai mai ia matou. Palota i le faapitoa o tina ma le suiga o le Faavae, palota e lagolago. Na pau lava le mea lea e lauga atu ai sui usufono nei, aveese uma noataga ia e i ai nei. E leaga foi a fai promotion lea e fai i aso uma lava i le ao ma le po, na pau lava le mea lea e aumai e le Ofisa lea, o lau aiatatau. E le o aumaia ni faamatai, e le o aumaia ni mea ia. E uumi tatou Fono, ae le mafai foi ona tuufau saunoaga e alu pea, a o lea e pei e agai mai ia matou, ona fai mai lea e leai ni matou sui usufono tamaitai. O le a le matou mea e fai? Matou te o e toso mai i totonu?

FOFOGA FETALAI: O lea ua maua lou finagalo Lealailepule.

Tofa Aveau Tuala Lepale Niko Palamo: Lau Afioga i le Fofoga Fetalai, na o sina avanoa semeamanu o malolo le Afioga i le Tamaitai Minisita.

FOFOGA FETALAI: Faapuupuu mai Aveautau.

Tofa Aveau Tuala Lepale Niko Palamo: Lau Afioga i le Fofoga Fetalai, e taua le saunoaga a le Afioga i le Minisita aua o lea e faapea mai, i lau lava vaai i ai o se mea e fia faamalamalama, e leai lava se faailogalanu o le Tulafono Tau Faaofi. Aua e le o i ai lava se mea o le Tulafono Tau Faaofi e faasa ai se tamaitai ona alu i se palota, a o lea ua tatou taumafai e fai isi Tulafono ina ia toatele ai tamaitai i totonu o le... A o le mea lea e ala ai ona ou fesili, o le tele o le mafuaaga lea e ala ai ona le toatele ni tamaitai i totonu o le Palemene ma mea nei, o le faamatai. Aisea? Aua foi e faasa e isi nuu ona matai tamaitai. E faasa e isi nuu ona saofafai tamaitai i totonu o le saofaiga. Afai la tatou te o tatou i le vaega lea, fai muamua le itu lea o le aganuu ina ia mafai ai ona foia le vaega lea, aua o lea o le a tuuaia le Tulafono, a o lea matou te talanoa atu i le vaega lea o le Tulafono Tau Faaofi, o lea o le a afaina ai le aia a tina ma tamaitai. Ma lou faaaloalo lava.

FOFOGA FETALAI: Se i tuu atu le avanoa Gatoloai. Tulai mai se tasi o sui usufono mamalu mo Faasaleleaga Nu.1.

Afioga Hon Gatoloaifaana Amataga Alesana Gidlow (Faasaleleaga Nu.1): Faafetai i lau Afioga i le Fofoga Fetalai. E leai ua laga se leo ona o le fia faasao o le saunoaga a le Afioga i le Taitai o le Itu Agai e faapea, leo o tamaitai ananafi, e limataitaiina. Ou te le o mailoa po o le a le limataitaina lea e faauiga mai ai, ae ia te au lava ia, e pei e foliga mai faapea, o maua ma te le

iloa fai ni o matou manatu i luga o le Tulafono Tau Faaofi. E leai, o maua na filifili mai e o ma itumalo, o matai, ua i ai le tofa, ua i ai le iloa, e feliuliuai ai, e tusa ai ma Tulafono ua aumai. Ou te fia faasao la, e leai e le limataitaiina maua i ni manatu o nisi, ae ua ma malamalama ma iloa atoatoa le uiga o Tulafono ma le agaga e aumai ai. Faafetai.

FOFOGA FETALAI: Ou te manatu o lea ua manino ma malamalama o lea la ua saunoa tonu lava Aveau i le mataupu lea na avatu ai lava le upu a le Minisita muamua. Ua silasila le tatou Malo i le auga o le faamoemoe, o le tatou toe foi i le ponati ma le ute o faigamea, o le tatou toe vaavaai i le tatou faamatai lea e malu ai tatou. Ua lava lea, ou te manatu ua manino ma malamalama le mataupu. Ma ia outou finagalo malilie sui usufono, o lea lava ou te tuuavanao atu, ae a tali loa le Malo, e le mafai ona toe... o mea sa tapa i a outou lauga, o lea ua tali le Malo. O nisi mea fou, o le aiatatau lea a le Malo e faalauaitale mea sa aafia i outou finagalo. Ona manatu lea le paia e ma le mamalu o le tatou Maota, ua malamalama le mataupu. Ae o le a tuu le avanoa e tali faaii mai ai le Afioga i le Tamaitai Minisita ona tatou faagasolo lea.

Tulai mai lau Afioga i le Tamaitai Minisita.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai. Lau Afioga i le Fofoga Fetalai, o lea tatou te i luga o le faitauga faalua o le Tulafono Tau Faaofi i felafolafoaiga, na saunoa lava ma fetalai le Maota. Ou te le i faalavelave faatasi i saunoaga, maitau, faamau, aua o lea e i ai le avanoa e tali atu ai. O lea la ua tali atu. Ma e faapea foi o le tali atu i a outou fesili, o le aoatelega o sini ma autu o le Tulafono, le mea lena o lea e fai mai ai le Tulafono Tumau e tautala i ai. O le a le aotelega? O le faamatai. Ae o le tolu tausaga lea e tau mai, o le tolu tausaga o le fua lena, ae na mafai lava ona faapea, sefulu tausaga. A faasalalau galuega a nisi o tofiga o le Malo, fai mai ia le i lalo ifo o le valu tausaga le galue i luga o le vaega o le Pulega. A tatou fua la i ai i na ituaiga galuega ma le tofi lenei o le sui usufono, o le a le mea o le a le tuua ai se tatou fua i le agavaa po o le iloa, po o le silafia e le sui tauva i lona matai. Ma, aua le toatamai le tatou Maota, o le mea lenei, o lea e fefaaaliai o tatou manatu, o lo o faafogafoga mai foi le atunuu. Ma e le o se mea taliagofie e le Faigamalo le i ai o se mau po ose lafoga ua aumai e le Malo lenei se Tulafono e taulia ai le avanoa o tamaitai. E le o se lafoga taligofie. Ma o le mea moni lava, o lea lava ua aliae mai i saunoaga, e tautala i le alofa ae masalosalo lau faalogo po o fea moni le alofa. Aua o lea lava ua ou tau atu le agaga o le Tulafono Tau Faaofi lenei, ina ia taofiofi le iumaea i le uiga o le faamatai ma i latou e ofi mai totonu o le Maota lenei.

O le mau lea faapea o lea faatoa laga tamaitai ona ua fai le Tulafono o le Suiga o le Faavae, o le a le isi feau lea e momoli mai ai i lea mau? Ia, tailo i sa outou faafofoga, ae o le feau lea e momoli mai i le ituaiga mau lena, o tamaitai na, o tamaitai e papau, ioe, e sue avanoa, opportunist. A o lea lava e tuutuu atu lava le sa o le Malo ma tau faamatala atu le uiga o le Tulafono Tau Faaofi lenei. Ma o lea foi ou te toe fai atu, e le na o sui usufono tamaitai, e lavea ai foi ma sui usufono alii.

Lau Afioga i le Fofoga Fetalai, ua umi lau tautalaga. A umi, ua tatau lava ona umi. Aisea? Toetiiti lava 50% o tagata Samoa o le itupa o tamaitai. E le mafai la ona taliagofie e le Malo ituaiga lafoga ia e aumai e le Taitai o le Itu

Agai ma lena Itu. Ma o le mea moni lava, ia tailo. E toe foi lava i le talofa e, i le tagi o le talofa e. Ua ou mafaufau lava po o le a le upu e faamatala ai le moni o feau ia e momoli mai i le alofaaga, moomooga alofa o le Taitai o le Itu Agai. Na o le pau lava le upu lea e oo mai i lou mafaufau, e faapili le namu ae folo patato le kamela, ioe. Ua matuai tele lena kamela ua e foloa, ioe.

Afioga Hon Palusalue Faapo II: O le mea e fia faasao lau Afioga.

Afioga Hon FIAME NAOMI MATAAFA: Ioe, talofa i tamaitai o Samoa pe a faapea o le uiga lea o tatou Taitai.

FOFOGA FETALAI: Malie lau Afioga i le Tamaitai Minisita se i tuu atu le avanoa...

Afioga Hon Palusalue Faapo II: E ala ona aumai fesoasoani a Malo, ona o le agaga lea matou te avatua. O lona uiga, o i moni lea e folo ai le kamela, ioe, lau Afioga i le Tamaitai Minisita aua o lea e lalamua i mea ia. E ala ona tutulai atu lenei Itu, e lagolago, talofa e i nai sui tamaitai, o nisi o le a le agavaa. Na pau lava lea, o le faauigaga moni lava lea o le matou tulai atu, o le lagolago atu i lau avega, o le lagolago atu i sui tamaitai o lo o fia o e avega ma sui usufono o le Maota. O le uiga tonu lena...

FOFOGA FETALAI: Ia o lea ua maua lou finagalo.

Afioga Hon Palusalue Faapo II: A o lea ua faauigasese mai. A o le agaga moni lava lena, e le o ni upu e avane ai, o upu e lagolago ai. Vaai, po o a ni semina e fai, e o atu lava le Itu lenei. O a faailoga ia e tulai mai? O le lagolago ina ia toatele sui usufono tamaitai e tauva, ioe. O lea e faamanatu atu i lau Afioga i le Tamaitai Minisita.

FOFOGA FETALAI: O lea ua maua lou finagalo lau Afioga i le Taitai o le Itu Agai. E manatu ua manino ma malamalama le tatou mataupu. Ae o le a taatia ia le ogatotonu o le Maota, e faamasino mai le faafofogaaga a le atunuu. E le o ni ai avega foi lou finagalo Palusalue, o lea ua lagona la outou foi finau mai, o lea foi ua lagona le tali mai a le Malo, ona faamasino lea o le atunuu ae le mafai ona suia ai le mea lea. O le tali a le Malo o le tali lava lena ma le faamalamalama. Ou te manatu taatia o lea e faafofoga le atunuu ma i latou uma o e o fia agai i le faiga palota, i alii ma tamaitai o sui faaolioli ma sui tauva, ia fai le filifiliga a le tagata ia, a o lea ua matua manino ma taua foi lo outou manatu i le isi itu. A o le finagalo o le Malo, ou te manatu e le tataua ona alu ese ma se manatu e tau atu ai le mea moni na mafua ai ona faataunuu le Tulafono Tau Faaofi lenei.

Ia tulai mai lau Afioga i le Minisita e faaiu mai le saunoaga.

Afioga Hon FIAME NAOMI MATAAFA: Lau Afioga i le Fofoga Fetalai, e sao lelei le saunoaga a le Taitai o le Itu Agai, e lagolago i semina ma fonu e fai.

Sa saunoa le sui usufono tamaitai ia Faimalotoa ma tau ai se fonu tele a tamaitai na faamalamalama ai le Tulafono na sui ai le Faavae ma le Tulafono

o Faiga Palota. O lea la na fesili ai nisi o sui usufono pe na faamalamalama le tolu tausaga. Ia, o le tali puupuu o le mea lena, e le i faamalamalamaina le tolu tausaga, leaga o lea faatoa aumai le suiga o le Tulafono Tau Faaofi i le taimi nei. Ae toe foi lau faamatalaga i le mea lea e ese lava upu e fai, ae ese le uiga o le talitonuga lea e tatanu ai.

Na valaaulia le Afioga i le Taitai o le Itu Agai e afio atu e fai sana saunoaga i le fono lea a tamaitai, ona e ui o lea e i ai uma matou o sui usufono tamaitai o lea e nonofo i le Itu a le Malo, ae sa i ai lo matou faamoemoe maualuga o le tatou galuega e faifaatasi, lea na talosaga ai i le Afioga i le Taitai o le Itu Agai e afio atu. Ae talofa e, ioe, talofa e, e afio atu le Taitai o le Itu Agai fai lana saunoaga i sui tamaitai e tauva. O le a lana upu na ave? Fai mai o tamaitai ia sa sao mai totonu o le Maota, o tagata e leai ni o latou taitoalua pei o Fiaame, ia po o tagata ua feoti a latou tane, te i lava ua tau ai le Afioga i le Tamaitai sui usufono ia Faimalotoa. O lo o soifua lelei pea le alii o Faimalotoa. A le o lea, o le faaipoipo i se papalagi po o se Saina. Talofa e, e tautala mai lava i le tulaga o le faaipoipoina po o le faaipoipoina o le tamaitai, e misi atoa le agavaa, le agavaa o le matai, le agavaa o le matai e tautua i totonu o le nuu m le itumalo. A ou faaupua i se faaupuga lata mai, upu faifai, ioe. O le fuaitau foi e faapea, o le nofo i tamaloloa papalagi po o tamaloloa Saina, o le mea lea e i ai, e le mafai e le tane Samoa ona fai se galuega e fesoasoani ai i lona toalua. O upu lava nei, e foliga mai e alofa, ae tatagi mai ai le le faatauaina o tamaitai, i le vaai maualalo o le Taitai o le Itu Agai i tamaitai o le atunuu.

FOFOGA FETALAI: Malie lau Afioga i le Minisita, se i tuu atu le avanoa i le Afioga i le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, a faasolo i le talafaasolopito o tamaitai ua omai i totonu o le Maota lea, lea e faatusa ai lau tala, ae mai le amataga o tamaitai le history o le Palemene lenei. O tamaitai e nonofo i papalagi ma tamaitai e maliliu o latou alii. O le mea lena e faatusa i ai lau tala. A o lea e mimilo e le Afioga i le Tamaitai Minisita. O le mea lea e ala ai ona umi a tatou fono ma tatou...E le mafai ona matou nofononofo, e tataua ona matou tutulai atu e faasao.

FOFOGA FETALAI: O lea ua maua lou finagalo.

Afioga Hon Palusalua Faapo II: O le mea lea lau Afioga i le Fofoga Fetalai, ou te fautuaina le Minisita e tatou te faagasolo i le tatou Tulafono, aua le taeina mai fua lapisi ia e....ioe, leaga e i ai le mafuaaga e ala ai ona fai lau upu, ona o le talafaasolopito o tamaitai e omai i le Maota.

FOFOGA FETALAI: Malie o lea ua ou maua. Malie lau Afioga i le Taitai o le Itu Agai, pei lava ona ou taumafai atu i le taimi ua sola. O mea uma ia e saunoa i ai le Afioga i le Minisita, leai o mea na afeafea i a outou saunoaga. Ia outou finagalo malilie, ave le avanoa se i tali, o lea ua ou talosaga atu o lea lava e....A faapea foi e aafia se finagalo, silasila foi, o lea lava ou te avatu le avanoa e tali mai ai.

Ae malilie sui usufono, tulai mai lau Afioga i le Tamaitai Minisita.

Afioga Hon FIAME NAOMI MATAAFA: Ioe, o le uiga o lau faamatalaga, e tasi le ata, ae eseese faauigaina. Ma o le faauigaina o se ata, e tau mai ai, le mea lea e i ai le mafaufau o le tagata lea e vaai i le ata lena. Ia aua o au foi ua fai sina leva ona i ai i le Palemene, o le ata lava lea e tasi le talafaasolopito lea e saunoa mai ai le Taitai o le Itu Agai, e moni, ua oti a latou tane, e nonofo i papalagi, ae ita aua foi, o le toatele foi o isi tamaitai, o latou alii o alii Samoa, e i ai foi ia tamaitai sa sui usufono faatasi ma o latou alii, e toatolu, pe a mafaufau atu i ai, ioe, Leaupepe, Aiono ma Maiava, na i ai faatasi i inei i le Maota lena ma o latou alii. A o le ata lea ma le faaupuga na fai, ia au, a ou faauigaina le ata lea, o le tamaitai ua tea ese atu ia tausaga lea sa ave ai le faamuamua i lona aiga, o lana fanau, ioe. Pe a maliu foi le tamaloa, ia o le soifuaga lava lena. A o se tamaitai ua suafa matai, o le tamaitai e i ai ona tomai, ia a fua i tamaitai o lo o i ai i le taimi nei, o lena e tou te silafia lelei le Afioga i le tamaitai sui usufono mo Gagaifomauga Nu. 1 ua leva ona tautua i le Malo o le Faauluuluga o Matagaluga. O le Afioga i le tamatai sui usufono mo Faasaleleaga Nu. 1, o le tamaitai ua leva ona tasi aiga e fai ana pisinisi. A fua foi ia te au, e fitu lelei lava tausaga na ou matai ai, faatoa ou sau i le Palemene, ae leai lava se taua o na mea i le agavaa. Aua na o le pau lava le upu lea e fai pe a ou faauigaina le ata lea e aumai e le Taitai o le Itu Agai, a e le nofo i se Saina, pe e le i oti i lou toalua, ia ailoga e te.....ae o le mea e momomo ai lou loto, o le isi feau lea e momono mai ai i le mea lea, e le mafai e le tane Samoa ona fai se galuega, pe e te tau le upu lea o le tautua, tautua lona toalua, fesoasoani i lona toalua. O le molimau lea e aumai, e le mafai e le tane Samoa ona fai le mea lena, ioe, talofa e.

Lau Afioga i le Fofoga Fetalai, e le talia e le Malo le mau lea mai le noatia o le avanoa o tamaitai – ma ou te toe momoli atu lava le upu lea, ‘faapili le namu ae folo patatō le kamela.’

Ona ou see mai ai lea lau Afioga i le Fofoga Fetalai i le isi vaega o le Tulafono.....

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Ia tulai mai le sui usufono mo Faleata Sisifo.

Tofa Lealailepule Rimoni Aiafi: E le mafai lau Afioga ona nofononofo le itu lena, ae fai ni lafoga faapea a le Afioga i le Tamaitai Minisita, e na te le amanaia le matou lagolago lea e ave i tina. Ou te le iloa la, po o matou lea e lauga mai i ai po o la e lauga i lana vaega, leaga o lea e avatu o matou manatu, a ua tatala le avanoa, tatala le avanoa. Aua ne i toe i ai ni mea e togi le moa ae uu le afa, (.....) a ua tatala, tatala, ae aua ne i uua le moa, uu e le Minisita le moa, (.....) ai o fiaola le moa.

FOFOGA FETALAI: Ia malie le sui usufono mo Faleata Sisifo.....

Tofa Lealailepule Rimoni Aiafi: Faamolemole, leaga o lea pei ua agai mai i le itu lena, ae faapogisa le.....

FOFOGA FETALAI: Ia ou te taofi e tatau pea ona.....

Tofa Lealailepule Rimoni Aiafi: Afai o se saunoaga a le Afioga i le Taitai, o lona lava lea finagalo.

FOFOGA FETALAI: O lea ua maua lou finagalo.

Afioga Hon Palusalue Faapo II: Lau Afioga i le Fofoga Fetalai, mo le faasaoina o le taimi o le Afioga i le Tamaitai Minisita, leaga e le taugofie i le itu lenei lafoga ia e aumai, ioe. Ma sa i ai lou manatu i le Afioga i le Minisita, o le tatou Fono e fai i le feavatai, a o upu ia e lafo mai, ua avea le matou lagolago i tamaitai ma upu ia...silasila la i upu ia e aumai?

FOFOGA FETALAI: O lea ua maua lou finagalo.

Afioga Hon Palusalue Faapo II: E le taugofie iinei.

FOFOGA FETALAI: O lea ua maua atu le Taitai o le Itu Agai. Silasila foi o lea ua tuu atu tuu atu a o lea o le a faasolo ina sopoloa le tatou Fono ma sopo tuaoi. Ou te taofi o le Maota lenei e avatu ai upu tautino ma upu moni, e tatou te taofi foi, leaga o upu ia e tatou te felafoai, o upu o alagaupu a le atunuu. E leai ni upu o le alagaupu faapea a le atunuu, ua togi se afa ae tuu se moa ma titina le moa. E faatonuina e aveese upu ia ma faamaumauga, e le talafeagai i le faafofogaaga a le atunuu.

[Upu na faatonu e le Fofoga Fetalai e aveese ma Faamaumauga o le saunoaga a le sui usufono mo Faleata Sisifo: togi le afa ae uu le moa, pe na ona uu o le moa, ae uma titina le moa].

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu, Afioga ma Agafesootai): Lau Afioga i le Fofoga Fetalai, pe maua se avanoa faamolemole.

FOFOGA FETALAI: O le ala lea o lou fai atu i le taimi ua sola, malilie sui usufono, silasila foi, e le o ni ai avea, o le finagalo foi lea e saunoa i ai le Minisita i upu ia, o upu lava o la e sagatonu upu ona o upu o le aganuu. A tatou agai loa e sui upu, ona le manuia loa lea. O lea ua ou fai atu, o lea na ou taotaoama atu lava, o lea ua faaii mai le saunoaga a le Tamaitai Minisita. Malilie sui usufono, ina ne i meaane ua alu alu alu le tatou mataupu lea ona atili ai lea ona le mautonu le tatou mataupu ma le manino. Ona manatu lea, taatia ai i le mataupu lea o lea ua malamalama. O lea ua faaii mai le saunoaga a le Afioga i le Tamaitai Minisita.

Ia lau Afioga i le Minisita mo Tina ma Tamaitai, Atinae o Nuu, Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ona o lou foi tulaga o au o le Fofoga o Alii o lenei Itu Faaupufai, ia a o le toeaina foi o le aganuu ma upu faapea, e matua toeaina lava i le tulaga i le aganuu. O le mea lea e popole ai ua vaai atu ua matua popole lava le Itu Agai i le saunoaga a le Minisita i le upu lea na faaogaina, ae faafetai o lea e

faaaoga atu ia te outou, o le Afioga tuusao lava a Iesu na fai i le Au Faresaio ma le Au Tusiupu, e le i faia i se tagata Samoa, aua e leai ni kamela i Samoa, o le mea lena e tataua ona silafia. A e silasila i le loloto o le upu a Iesu, 'e faigofie ona e taofi le namu, ae folo le kamela,' a o le kamela o le mea e tele atu i le tagata, e matautia le loloto o le silasila faa-Mataupu Silisili a lo tatou Alii.

O le mea la lea ou te fautua atu ai ia te outou, faalogo lelei i le mea e saunoa atu ai le Afioga i le Minisita, a ou rate ina le lauga a le Minisita ma ana tali ma o outou finagalo uma tuu faatasi i le 10 e agai i le 1, e 10 le Minisita, a o le faasolo 0 lava outou agai i lalo, ia ma le faaloalo.

Afioga Hon Palusalue Faapo II: Lau Afioga i le Fofoga Fetalai.....

Tofa Hon Tolofuaivalelei Falemoe Leiataua: Minors, minors, minors.

Afioga Hon Palusalue Faapo II: Lau Afioga i le Fofoga Fetalai, e te faataga nei saunoaga faauigalua, le mafau, a o le Minisita sa avea ma Fofoga Fetalai, e te le aoaia mai matou, e te le aoaia matou, alu oe e lauga i.....Leaga e tele le uiga o au upu ia e aumai, e le o matou o sana fanau, alu e aoai lau fanau, o sui usufono mamalu o le Maota lea e saunoa mai i ai. O le mea lea e vevesi ai a tatou Fono.

FOFOGA FETALAI: O lea ua ou maua lou finagalo. Ia e tataua ona outou fesoasoani mai i le faatoatoaga lea e faatoatoa atu ai a tatou Fono. Malilie sui usufono, o lea ua manino le folasaga a le Tamaitai Minisita. Afai foi e paopapa i la outou faafogafoga, ia malu le vai. O le tatou Fono lea tatou te felafuai, aumai, avatu, ae le tuumamaina foi e tuga upu ia e atugalua i ai le Minisita o lea e mafua ai ona fai atu. O le a se maitau a Samoa o ia o le Tamaitai Minisita, o le Tamaitai, ae ave ni lafoga faapea ua toe fai e Fiamase Tulafono e taofia ai Tina? O le a se maitau a le atunuu? Ailoga e tou te talia pe a o outou lea e tou te tulai i se tulaga i lona nofoa? O lea e tulai mai le Minisita e faamalamalama le Tulafono Tau Faaofi, leaga o la e faafogafoga mai le atunuu aemaise o le itupa o tina ma femateai mai, pe sao outou pe sao le Malo?

Ia malilie sui usufono, a foi na ou fai atu i le taimi ua sola, taatia laia i le ogatotonu o le Maota, faamasino mai i latou aua o le Tulafono Tau Faaofi tonu lea e agai ia i latou o lo o sauni i le Faiga Palota, o sui tama ma sui tina, faafogafoga lelei outou i le mea lea e avatu, afai ua e faafogafoga ua lava lau tautua ua e lagona ua tataua ona sii lou lima e te alu i le Faiga Palota, o le mea lena e fuafua i le mea lea e avatu. O le tagata ua matua lava taoso, sama se mago, fili se agavaa, leaga e le faigofie o tatou tofi, e le o le tafafao tafafao lava i fao omai o, e leai, leaga e le omai ni tagata tafafao vale iinei i le Maota, na o tagata ua uma ona filitagaga i ai le paia ma le mamalu o Samoa atoa.

Ona ou manatu lea lau Afioga i le Tamaitai Minisita, ia tulai maia e faaii mai le saunoaga. Malie lava, se i toe tuu atu le avanoa, leaga o lea e tau tulai mai le sui usufono mo Gagafomauga Nu. 1.

Tofa Faimalotoa Kika Iemaima Stowers: Lau Afioga i le Fofoga Fetalai faafetai mo le avanoa. I lenei taimi ona o lenei lava e i luga lava o tina ma

tamaitai, e fia faaleo atu se lagona, sa ou fia tulai atu analeila i le molimau foi a le Tamaitai Minisita i le fonotele a Tina, ae peitai ane ia ua tulai mai le uso a sui usufono ia Gatoloaifaana e fai ma sui, paga lea, na o le toatolu o matou ae e lagona le tagi o le loto ma le mafaufau ona o lea sa toe tulai mai le Afioga i le Taitai o le Itu Agai e toe tau kavakava mai ia ana saunoaga sa fai ananei. Ae paga lea ou te faalua le molimau a le Afioga i le Minisita sa tau o matou igoa, sa tau o matou igoa, tau le igoa o Fiamē leaga o le tina e leai se toalua, tau le igoa o Gatoloai e nofo i le papalagi o mea mai fafo, tau o ta ita nei e nofo i le Saina ia po o ua tetea, ona tagiuu lea. Ua taufaifai, o lo o faafofoga mai o matou aiga e le lafoa ni upu faapea i totonu o ni aiga a o matou pulapula atu. E sa, o le vatapuia, ua lagona ai lava le...O le tulaga lea na fai e le Afioga i le Taitai o le Itu Agai e pei ona ou fai atu, e nofo pea ae oono, o le faalumaluma i ona tuafafine sui usufono sa tofi mai e aiga o nuu ma itumalo, na o le toatolu i matou, ae taufaifai i ai i luma o le toatele o tagata. E a pe a malie ia lau Afioga i le Fofoga Fetalai, ua lava ia ia upu e faatatau i tina ma tamaitai, o lo o faafofoga augafaapae, o faletua ma tausī aemaise foi....tulou le Taitai o le atunuu, Afioga i Minisita, o a outou Afioga o lo o i ai o outou faletua ma outou tausī o lo o faapena ona fai le tautua mo outou uma. Ae aisea ea o le a saga fai ai lava le taufaifai i tina ma tamaitai o lo o matou pulapula atu e na o le toatolu matou ma faafogafoga mai tina o Samoa? O se tatalo lea i lau Afioga i le Fofoga Fetalai, ma le faaaloalo lava.

FOFOGA FETALAI: Malo, faafetai.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: O le mea lea na ou fai atu ai. Na ou piiama atu lava.

Afioga Hon Palusalua Faapo II: Ioe lau Afioga. Ua avea lava o se mea mamafa, a o lau aiuliuli ia i latou.....

FOFOGA FETALAI: O se aiuliuli la le mea lea ua e faafofoga la i ai?

Afioga Hon Palusalua Faapo II: Ioe ua nofo ma faamamafa, ae leai o au aiuliuliga i le Minisita ma sui usufono sa i ai, e faatoē ai le Fonotaga i lena aso. A o lea ua aumai i i le Maota, ua matua liliu atoa le uiga. Ae e i ai le uiga na ala ai ona ou faia e pei ona ou fai atu muamua. O le talafaasolopito o tamaitai iinei i le Maota.

FOFOGA FETALAI: O lea ua maua atu lou finagalo le Taitai o le Itu Agai.

Afioga Hon Palusalua Faapo II: O lea e faamalulu atu i a outou Afioga pe afai ua ou faamatala, na outou o foi fai a outou tala tausua ia au i le aso lea, a o lea ou te le o avatua. Ioe, na fai a outou tala e pei e faifai ma faamuamu mai, ae ou te le manatu i ai. O le mea lea lau Afioga. E faamalulu atu i sui usufono tamaitai.

FOFOGA FETALAI: O lea ua maua.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui: Lau Afioga i le Fofoga Fetalai, se o aso lava nei ua le o toe i ai ni mea e toe taofiofia. Ua luga uma mea uma. Palu, e a pe a se i aumai foi lau pitolaau? O a tala na avatu ia te oe, o lea matou te fia faalogologo i ai.

FOFOGA FETALAI: E momoli atu vaimalu i puega. E taugata tele le tulaga o le tatou mataupu ua oo i ai. E manatu foi le paia ma le mamalu i le faafofogaaga a sui usufono tamaitai, ia malu le vai, o lea foi ua faalalolalo atu le finagalo o le Afioga i le Taitai o le Itu Agai. Ua avea lava lona fia malie e avea ma mea sese. O lea foi ua logona i le Maota lana faamaualaloga ia faafetai. O le agaga lena o lea ua fetau fola. A o tulaga ia i upu ia na outou faia i ai, ia taatia ai faapea.

Tulai mai le sui usufono mo Faleata Sisifo.

Tofa Lealailepule Rimoni Aiafi: Faafetai, malo, e faamalulu atu, leaga o lea pei e lauga foi lele, manaia le campaign a le Afioga i le Minisita. A o le mea, welcome to Politics. A ua outou fia afio mai i le tatou fale lenei, it's all part of politics, ae aua tatou te faamamafa. Ioe, e tilotilo i le context na fai ai. Afai o le a se sasi o le Afioga i le Taitai o le Itu Agai, ia o matou lava na. A o lea e faafofoga mai, o le lagolago a le Party lenei, e selau pasene na faagata e le palagi ae ova atu i le afe pasene le matou lagolago.

Ma le faaloalo lava.

FOFOGA FETALAI: Tulai mai lau Afioga i le Minisita e faaiu mai le saunoaga.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai. Ua faaopoopo foi ia sui usufono tamaitai o le Maota, ae o lea ou te vaavaai atu o soiso mai le sui usufono mo Faleata Sisifo ma le la itu o le tatou Maota. Ioe e pei e malie, a o lea e saunoa atu ia le sui usufono tamaitai, e le malie. E le malie aua e nana mai ai i ina le uiga faailoga tagata. A o le mea lena e tataua ona alo ai tatou o sui usufono, o le faailoga tagata.

Lau Afioga i le Fofoga Fetalai, tatou see atu ia i se isi vaega aua o lea ua tagi talatala le Afioga i le Taitai o le Itu Agai ma sui usufono e faapea, o lea ua matou agai atu. Oi, o le a ea la lo outou manatu, na o lo outou saunoa ma fetalai ma aumai lafoga, ae nofonofo le Malo e le tali? E ao ona tali le Malo. Ioe, e le gata e tali o au o le Minisita e ou le Tulafono Tau Faaofi, a o le Tulafono Tau Faaofi e saina ai le igoa o Fiamē, Tulafono a le Malo. Ioe o le Malo lenei. Ma a ou tautala foi i le faatamaitai aua o lea e pei e aumai foi outou finagalo faapea o au o le sui usufono tamaitai. O lea o le a ou tali i lau Afioga i le Taitai o le Itu Agai e auala atu i le Nofoa, leai e le talia foi i ni vai outou finagalo faaalua. Ioe, aua e ui e toaitiiti le numera o tamaitai i totonu o le Maota lea, ae a faapea e moni le agaga o le Tulafono i le faavae lea na tatou suia, aua ne i mou atu le leo o tamaitai, pe toatasi, pe toalua, pe toatolu, pe tolusefulu foi, leai, e i ai lava le faamoemoe e le gugu le leo o tamaitai i totonu o Upufai o Samoa.

Ona ou see mai ai lea i le vaega ua faalaugatasia ai ia faasalaga i le agavaa o sui usufono e tauva e avea ma sui usufono, po o le aveesea o o latou tofi ona o ni soligatulafono mai le lua tausaga i le fa tausaga. Lau Afioga i le Fofoga Fetalai, sa saunoa nisi o sui usufono, pe o lelei lea fua, pe tataua ona fai se isi

fua. A o le mea moni lava lau Afioga i le Fofoga Fetalai ma le mamalu o le Palemene, o ia lava mea e tatau ona i ai lona fua. O le fua la lea, fa tausaga mo le ulufale, fa tausaga mo le toesea atu o le tofi ona o soligatulafono. Ma o na foi soligatulafono, e le faapea na o le falepuipui, o le agaga o le Tulafono, a faapea e fa tausaga le faasalaga ua tuu i ai i se soligatulafono, pe e te falepuipui pe leai, e lavea lava oe i le Tulafono lea. A i ai foi se aso, se isi Paeaiga ua manatu ia le Maota ua ao ona sui le fua lea, ia ona sui lea. Ae tatou malilie ia lau Afioga i le Fofoga Fetalai, o le fua lena mo lenei vaitau. O le isi Fuaiupu o le Tulafono sa fesiligia, o le fuafuaga lea mo Vaimauga ma Faleata, i e sa lesitalaina o latou suafa, i le Lola o le 2011.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Malie lau Afioga i le Minisita, se i tuu atu le avanoa i le faauilavea a le sui usufono.

Tofa Lealailepule Rimoni Aiafi: Faafetai i lau Afioga i le Minisita. O le mea sa ou fesili ai, i lou talitonuga, e le tatau ona tutusa ia le aia a le tagata o lo o fia sau e avea ma sui usufono ma le tagata o lo o avea ma sui usufono. E eseese mea ia e lua i lou talitonuga. O le tagata lea e fia sau i totonu e sui usufono, o la e le i sui usufono, ua uma foi ona tuli ona faasalaga. A o le tagata o la e sui usufono, ua uma ona fai lana tautoga, ua maualuga foi ua avea ma taitai o le atunuu i le taimi lea. E le tatau la ona tutusa i lou talitonuga. E tatau ona tele le faasalaga e tatau pea ona mamafa pea i le tagata o lo o avea ma sui usufono, fua i le tagata o lo o fia sau i totonu. E le tatau la ona tutusa i lou talitonuga. O lou la manatu e tuuina atu i le Afioga i le Minisita, e i ai lou talitonuga, a faasala pe faafalepuipuiina a o avea ma sui usufono, e tatau lava ona otometi i ina le aveese ma le Palemene.

Ma le faaaloalo lava.

FOFOGA FETALAI: Tulai mai lau Afioga i le Minisita mo le faaauauina o le saunoaga.

Afioga Hon FIAME NAOMI MATAAFA: Lau Afioga i le Fofoga Fetalai, e faamauina ia le finagalo o le Afioga i le sui usufono, ae o le tali lea a le Malo mo lenei vaitau. Ia tatou malilie ia, o le fua lava lena ua fuafuaina.

Ona ou oo mai lea i le vaega lea o le Tulafono Tau Faaofi o se faiga e faasino e na o itumalo faaalalafaga o Vaimauga ma Faleata. O lea o lo o i ai le toe Teuteuga lea o i ai, o i latou o e sa faamauina o latou suafa i Lola o itumalo ia faaalalafaga i le Palota 2011, ae ua i ai so latou faamoemoe e faatumauina pea i totonu o Lola faaalalafaga ia i le taimi lenei. O le uiga lena o le toe Teuteuga lea, ina ia mafai ona faaauau ai pea i latou i Lola o itumalo faaalalafaga ia e lua.

Lau Afioga i le Fofoga Fetalai, ona ou oo mai ai lea i le vaega tonu o lau folasaga, i nisi mataupu na laga mai e le o i ai i totonu o le Tulafono Toe Teuteu. O le vaega lea sa saunoa i ai nisi o sui usufono, ina ia tuufaatasia le taimi e tapunia ai Lola Palota ma le faaulufale o sui tauva. E pei foi ona ou tautalagia i le amataga o lau folasaga lenei, o se mataupu lea sa faamauina foi e le Afioga i le Taitai mai la outou Fonotaga talu ai. Ae peitai, ua vaavaai foi ai le Matagaluega o Faiga Palota faatasi ai ma le Ofisa o le Loia Sili ma

faapea foi ona felafolafoai i ai finagalo o le Kapeneta. E i ai ia faafitauli ma itu e faigata ona faatino ai le faamoemoe lea.

Muamua, o le tapunia o a tatou Lola. A fua i le taimi o le tatou Faiga Palota talu ai o le amataga o Mati. A fua la i le tatou palota o lo o loma nei, i le fuafuaga masani lava ia faatulafonoina i le lima tausaga, o le amataga o Mati o le tausaga fou e fai ai le tatou Faiga Palota, ona tala mai lea i tua, o le taimi e tapunia ai a tatou Lola i le fa masina. O lona uiga, o le tapunia o a tatou Lola, o le amataga o Novema. Ma e manaomia e le Ofisa o Faiga Palota le fa masina i le va o le aso e tapunia ai ia a tatou Lola Palota ma le aso o Faiga Palota. Ona e moomia le faaleleia ma le tapenaina atoa o a tatou Lola, ma avatu foi i tua i le atunuu, ma toe aumai foi ni faasaoga e ao ona fai, e tapena lelei ai galuega a le tatou Ofisa o Faiga Palota. Ae o le le mafai ona tuu mai i ai i le taimi lea i le amataga o Novema le faauluina o tatou sui tauva. Ona o le mea moni lau Afioga i le Fofoga Fetalai ma le mamalu o le Palemene, o le taimi lea o lo o nofoia pea le Paeaiga lenei. O lona uiga, e le i maea le Peaiga ma e le mafai ona tatou fuafua i le isi Faiga Palota ae le i maea lelei le Paeaiga. O le faamaeaina o le Paeaiga e soosoo atu lea i le taimi e faataape ai le Palemene. Ma o le agaga lava ia o le Tulafono, o le taimi e aupito umi e tuu atu, e i ai pea le Palemene ona faamuta ai lea. Mo sui usufono ua leva i le Maota o lea tatou te manatua, o le taimi lava e faataape ai le tatou Palemene, o lona uiga ua uma le Paeaiga, na o le pau lava le aiaiga o le Tulafono faavae i ai, o le faaauau o le Kapeneta tau ina oo atu i le isi Paeaiga fou, i le maea mai o a tatou Faiga Palota. O le mafuaaga lea. O sui usufono foi sa saunoa aemaise lava i le agaga lea tatou te malamalama uma i ai, aemaise lava le fai mai o tatou tagata palota. E pei o lo o tui pea tatou o lo o umia ia le tofi i le taimi lenei. Ae ou te faapea atu ma le agaga faaaloalo, ia uso e malilie ia, o le faiga lava lena o le taaloga lea tatou te i ai ona o tatou foi lea tatou te umia tofi sui usufono mo lenei vaitau.

Afioga Peseta Vaifou Tevaga: Lau Afioga i le Fofoga Fetalai.....

FOFOGA FETALAI: Malie lava, se i tuu atu le avanoa i le sui usufono mo Faasaleleaga Nu 4, ona avatu ai lea o le avanoa i le sui usufono mo Palauli le Falefa ma le sui usufono mo Faleata Sisifo. Ia faapuupuu mai le sui usufono mamalu.

Afioga Peseta Vaifou Tevaga: Faafetai lava i le saunoaga a lau Afioga i le Minisita. Ona pei e tasi lea vaega na autu i ai le manatu o lenei sui usufono i le taimi ua sola. Ina ia mafai ona faamuta faatasi ia le faiga o Id nei palota ma i latou o lo o fia tauva i le Faiga Palota a le atunuu. Ona na avatu foi i le taimi ua sola le mafuaaga o sou foi taofi, aua foi o le taimi lenei, o lea lava e mautinoa lava e sui usufono mamalu uma o le Palemene latou itumalo, o tatou tatou te toe o i le palota. A o i latou nei e le o faailoa i itumalo i le taimi lenei, e le o mautinoa. O lea la o lo o silafia foi e le mamalu o le Maota, o lea lava e gasolo mai lava o tatou itumalo ma mamalu o afioaga i nai fesoasoani, e le mafai ona tuua aua foi o le tautua. O lea ua aumai le Tulafono o le tautua. Ma e leai lava se isi o le Maota lenei, e omai lona itumalo i ni talosaga ma mea e moomia ai le fesoasoani, ae fulitua i ai le tofi. O le mea moni lava e le aumaia loa e le tofi, ua uma foi lena tofi i le palota. O le ala lena o lea e taumafai atu ai le tuualalo i lau Afioga i le Minisita, ina ia paleni la le mea

lea. Afai la o lea e te finagalo, e le mafai ona tuu faatasi ia le tapunia o le tagata e fia alu i le palota ma le faiga Id, ia e i ai la le isi mea e tupu. Aua foi, afai la o le tulaga lea, e le tatau la ona agavaa le tagata lea e fia tauva i le tofi ona molia ta ita i le taimi lenei. Se i vagana la ua agavaa i le aso ua uma ai ona lesitala ia pe declare ia. Ae a fua atu i le taimi lenei se i tau ia Ianuari a o lea e le i faailoa pe declare. E le tatau la ona molia la ia ta ita i le Tulafono. O le ala lea e avatu ai le talosaga i lau Afioga i le Minisita, ua tatau ma onomea ona tapunia faatasi lava i latou e fia o i le tofi ma le faiga Id. Leaga o lea e tui mai e itumalo tatou. Ae faapefea i latou ia e le o faamaninoa le itumalo? Aua e le mafai ona tuua le tautua, leaga o lea ua faamamafa le tautua. Ia au lava ia o lea ua tau atu, na omai foi ananafi lou nuu, ioe, na omai ananafi lou nuu, o mea foi na mananao ai, e le mafai ona tuua, a o lea ua tapuni le Tulafono. O le mea la lena, e na ona ou faapena atu. Ua tatau ona tapuni faatasi ia le faiga Id tapuni ma sui faatutu.

Ma lou faaaloalo lava.

FOFOGA FETALAI: Malo. O lea ua faafofoga le Minisita. Ia onosai le sui usufono mamalu, money is not a problem for you.

Ia le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga i le Fofoga Fetalai mo le avanoa.

E muamua ona ou faafetai atu i le Minisita mo le faamalamalamaga matagofie, e lagolagoina e lou sui usufono le Tulafono Tau Faaofi. O le faamalamalamaina foi o vaega o le Teuteuga, ua matua atoatoa ona lelei. Aua e te faafogafoga mai i sui usufono ia e faitio aua o sui usufono popole ia. Po o le a lava le ituaiga e suiga e sui ai le Tulafono, e le taitai ona eeee ai ia o le tai loloto. Pau lava le mea lau Afioga i le Fofoga Fetalai e ala atu i lau Afioga, e i ai lava le vaega o le saunoaga a le Minisita, i lou lava lagona e toatasi. Ou te mafaufau i le vatapuia o le tuafafine ma le tuagane. I lana saunoaga faapea a na ia iloa o le vaega lea e i ai le vaega lea e faasasaga atu i i semeamanu ua fai mai sona laei o se sakete. O mea ia e fai i night clubs o le susue o le laei o le tamaitai i le tane, ma ou te talosaga atu i lau Afioga i le Fofoga Fetalai, ia aveese faamaumauga ia mai totonu o a tatou faamaumauga, leaga e omai a tatou fanau ona vaai lea i ai e pei e foliga e talanoa tatou i le tulaga faatosina i le va o le teine ma le tama. Ma lou faaaloalo lava.

FOFOGA FETALAI: Ia, Lealailepule, malie lava lau Afioga i le Tamaitai Minisita se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: E manatu o lea ua faaiuiu le saunoaga a le Afioga i le Minisita ae tele nai vaega ia sa laga e sui usufono aemaise lava i Itumalo nei Tu Taulaga i Vaimauga ma Faleata.

O le mea muamua na amata ai saunoaga a le Tamaitai Minisita i le amataga o lana lauga na faapea mai o le isi auga atoa o le suiga o le Tulafono Tau Faaofi, ia tasi le lola palota mo tagata uma. O le naunautaiga la lea na aveatu e matou....

Afioga Hon FIAME NAOMI MATAAFA: O le mea e fia faasao lau Afioga i le Fofoga Fetalai, o lea e faasolo atu lau faamatalaga ou te oo atu lava i ai i le mataupu lea.

Tofa Lealailepule Rimoni Aiafi: Oi faapea ua maea lau saunoaga. Ia e faamalulu atu.

Tofa Levaopolo Talatonu: Lau Afioga o le mea foi e fia faasao i le tulaga lea. O au e tau tutusa se lagona ma le mea na saunoa i ai le Afioga ia Faumuina. Na o le pau lava le mea ou te faamanatu i le Afioga i le sui usufono mo Palauli le Falefa, o le tiputa o le laei Samoa, ae alofa lau Afioga i le Tamaitai Minisita aua e te susuea maia le mea lena ia matou. Ma le faaaloalo.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e le na o le pau lea o lou matai o lea e faaaoga. E i ai foi nai isi matai leaga o lea na tape ai foi povi ma alu ai foi nai seleni e tatau ona faaleo uma pea ou matai. Ma lou faaaloalo lava.

FOFOGA FETALAI: E faamalulu atu i lau Afioga Faumuina ona o lea ua e taua le finagalo faapea i tulaga o tatou felafolafoaiga. E tatou te maitau eseese i se isi itu. O lea ou te maua le saunoaga a le Afioga i le Minisita ua ta i tua le faamalamalamaga ona o mea na tutupu i le atunuu. Ua ou maua lelei le finagalo ona ua tau tau tau le taua o lena tou te silafia, ae uma ane, se e le o se tamaloa le tagata lea e tau. E le i susueina la e le taupou lona tiputa, na masue i le taimi o le taua. O le agaga moni lena. Ia ua fai fai lava le tatou finauga i lenei aso e tiga ona outou silasila atu o le Tamaitai lea tou te finau ae fai lava. O le ala lena na saunoa ai le Afioga i le Tamaitai Minisita ae le o ni tulaga faapea o le a tulai mai ai ni feteenaiga. A o lea ua maua lou finagalo Faumuina, e taua foi lou finagalo nei meaane ua tupu, ae ailoga e tupu sea mea. Ma ou te manatu foi e le laei Fiaame i se tiputa. O aso na o le matitiva o le atunuu na mafua ai ona fai ofu tau na ina ia saoloto le alu o vae ma lima i taimi uma.

Ia ma ou te manatu e le o ni ai e avea le saunoaga a le Minisita o lo o manino o Nafanua o ona laei tau na, e fealuai lava faapena le tamaitai i aso ia. O lea foi sa saunoa manino i ai le Tamaitai Minisita ma o lea oute manatu ai o lo o manino ae le o se tulaga o le a tulai mai ai se manatu faapea o se le ava po o se le feavatai i totonu o le tatou Maota.

Afioga Hon Faumuina Tiatia Faaolatane Liuga: Lau Afioga i le Fofoga Fetalai na o lau talosaga pe mafai ona aveese ma faamaumauga. Na pau lava lea ma le faaaloalo lava.

FOFOGA FETALAI:Ia o le a taatia maia le saunoaga a lau Afioga.

Afioga Hon FIAME NAOMI MATAAFA: Faafetai lava i le saunoaga a lau Afioga i le Fofoga Fetalai. Ia o lea ua faamau le toe saunoa mai o le sui usufono e uiga i taimi e tapunia ai a tatou lola ma le taimi e faamuta ai ia sui tauva. Ona ua maitau atu ua i ai foi se finagalo ua afaina i le talanoaina o le lelea o le tiputa, ae faafetai lava i lau Afioga i le faamalamalamaina o le tali.

Ma na mafua ona fai atu lau tala o le saunoaga a se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi e faamanatu i le Itu le la, tusa a ou faauigaina e faapea, “Sole e le o se tama lena tou te fetai o le teine.” Ou te iloa la a tatou faauigaina i le tala lea na alu ai i luga le tiputa o Nafanua, ona o la e sa mafaufau le autau o le tama lea e faatinoina le taua. Ae ou te le iloa foi la, talofa e ia Leaupepe ma lana toe faamanatu mai. Pe ana iloa la e le aualii ia o le teine Nafanua, pe ese ai se gaooiga o le latou faamoemoe. A o le auga lava ia o le tala o le taua la e tau. A o le mea lena o lau tali atu i le saunoaga a Leaupepe e faamanatu i le aualii ia e le o se tama o le teine. A o le a foi la le mea e iloa ai le eseesega o le tama ma le teine? Ia oute le tau tautala atu ia outou. Na o le pau lava le mea e sao ai lau Afioga, leai e le i susuea na lelea. O lea la ou te faamoemoe, ia sui ane la le upu lau Afioga i le Fofoga Fetalai, aua le susue ae o le a ou sau ma se tiputa ae sauni lelei mai ni ili se i lelea ai i luga lou tiputa.

Lau Afioga i le Fofoga Fetalai, afai lava ua afaina ai le finagalo o le sui usufono, ia o le a le mea e leaga ai.

Afioga Hon Faumuina Tiatia Faaolatane Liuga: Lau Afioga i le Fofoga Fetalai e le tau faia se sakete o la e i ai ie, materials foi nei see through e le tau susuea la se mea, ma lou faaaloalo lava.

FOFOGA FETALAI: Leaupepe, e i ai se mea na e fia saunoa ai?

Afioga Hon FIAME NAOMI MATAAFA: Lau Afioga i le Fofoga Fetalai o lea na faasao mai e Levao, o le tiputa, e le o se sakete. O le sakete e alu i lalo i le pito lea, a lelea la le pito lea e ese le mea e vaai i ai.

Afioga Hon Leaupepe Toleafoa Apulu Faafisi: Lau Afioga i le Fofoga Fetalai, se ua ou toe tulai atu ona o lea foi ua toe taua tulaga foi o futia ua sola. O lea ua sili atu i le 2 itula a o lea ua toe taua ma laga le mataupu lea. O le faamanatu a le aumatutua aua e lelei le vesiga lene i Gagae ma Gagaifo sa lelea loa le tiputa po o le tulaga lea o le tamaitai tau o le atunuu, tetei loa ma le isi itu. Ia faapea loa, leai la e sese le mea lea tatou te faia. A o le mea lea e i ai o lea o le a oo lava i le taimi tatou te manava ai o lenei e fai sese lava. E tiga lava ona vaai atu o Fiamie a o lea e finau lava ma finau.

E pei o le ala lene e faamanatu atu, o lea foi tatou te tuu o le taimi lava e uma ai le tatou galuega o le taimi lava lene tatou te manava ai. E pei tasi lea itu e manatu ina ia silasila agai i ai i latou, a o le tulai atu o le Afioga ia Faumuina o le a le afaina aua e fou le faafofoga a Faumui. E tele le matai ae le i lea foi ona tautua....

Afioga Afualo Wood Uti Salele: Lau Afioga i le Fofoga Fetalai, na o le fia faasao lava i le Afioga ia Toleafoa, e le o Gagae, o le Aea i Sasae ma le Aea i Sisifo ona o lea tatou te talanoa, ae o le Malaefono lene o Afualo o le Malaolema. O i tonu lea ua sausaunoa i ai le Tamaitai Minisita. Ma le faaaloalo lava.

FOFOGA FETALAI: Palusalua, e a, e te le i malamalama lava i le tala lea e tau faamatala atu?

Afioga Hon Palusalue Faapo II: Lau Afioga i le Fofoga Fetalai, faamalo lava i le fautuaga a le Toeaina Matua le Afioga ia Leaupepe. Na o le pau lava le mea ua ou tulai atu ai, e lelei lava le faapalasi o le tiputa ia i o i le tou Itu, pe lelea pe a le tiputa ae aua le faapalasia mai i lenei Itu ma lelea mai iinei.

FOFOGA FETALAI: Se aua e te popole ua leva lava ona matamata lea Itu, a o lea e tau avatu se avanoa mo outou. E le se mea e tau fesiligia e pule lava le Tamaitai ia i taimi uma e fai ai ana gaoiga i lea Itu aua o se tasi foi o toe Ulutaia o lea Itu, ae tatau ona outou fiafia o lea e maua le tou matamata fua pe a faapea o lea.

Tofa Lealailepule Rimoni Aiafi: Lau Afioga i le Fofoga Fetalai, o le a ou te tau maitau na o Faumuina lava ma Palusalue lea e vevesi fua i o i le saunoaga a le Tamaitai Minisita, a ua le fiafia i ai toe foi i o ae taatia mai pea matou ma le tiputa. Faafetai lava.

Afioga Hon FIAME NAOMI MATAAFA: Lau Afioga i le Fofoga Fetalai, e ese le manaia o le tatou Fono, manaia lava le fai ma fai nai a tatou mataupu foi nei pei e faamalolo i ai outou finagalo, ia ma tatou toe mei mai foi i i i le tatou mataupu.

Ia ona ou oo mai ai lea i le mataupu sa laga o le aloaia lea o ulugalii e le faaipoipoina po o defacto relationships. Lau Afioga i le Fofoga Fetalai, ou te iloa o lo outou finagalo e leai se mea i lalo o lenei lalolagi e le mafai ona faia i lalo o le Tulafono o Faiga Palota. Ae peitai o faaipoipoga ma tulaga o ulugalii e ese foi le Tulafono ia e fai ai lenei vaega. A faapea o i ai se finagalo, e tatau ona amanaia ulugalii po o taitoalua le faaipoipoina, ou te manatu e tatau ona tatou saili i lenei Tulafono e fai lenei ma taiala e amanaia ai foi tatou Tulafono Tau Faaofi o Faiga Palota. Ia a tatou oo foi i lenei tulaga, e lelei lava ulugalii e na o le tasi a le la faiga paaga lea e le o faaipoipoina, ae peitai, e i ai lava isi e tele taitoalua, ona le iloa lea pe resitala uma taitoalua ia, pe na o le toalua matua foi lea o le faiga faa-Arapi e ave i ai le faamuamua. Ma ou te manatu ai atonu e i ai se taeao ona silasila foi lea i lenei itu.

Na aumai foi le mataupu lea i le mafai ona resitalaina i luga o komepiuta po o le online registration. Atonu lau Afioga i le Fofoga Fetalai ua le o toe mamao ona mafai foi lea ona tatou ausia lenei fuafuaga i le tatou Ofisa o Faiga Palota. E pei na o le pau lava le mea lea o lo o saili pea i ai le Ofisa o Faiga Palota o le fingerprint po o le faailoga o le lima. po o a auala e mafai ona fetuunai ai i luga o computers ia ona mafai lava lea ona faatino lenei faamoemoe, a o se mea e agai i luma.

Ona ou oo mai ai lea i se mataupu foi ou te iloa sa laga ma faamauina foi e le Afioga i le Taitai aemaise le tapenaina mai o le Tulafono Tau Faaofi lenei. O le vaega foi lea o se matai, e fai ma faataitaiga, o le matai o le Itumalo o Lotofaga, a o lona toalua e matai i Lefaga po o se isi afioaga, o le la fanau e matai i isi nuu o latou aiga. Sa i ai la se agaga na aumai foi faatalosaga i le Malo i le tatou Tulafono Tau Faaofi lava lenei e pei e foliga mai e fuafua mo sui faatutu, pe mafai ona aumai le toalua ma le fanau o le matai lea e resitala mai i le itumalo lea e i ai le matai lea e fia alu i le palota.

O le avatu o lenei mataupu ma vaavaai foi i ai ma sailiili i ai le Ofisa o Faiga Palota aemaise le Ofisa o le Loia Sili, ona e i ai se agaga faapea, muamua o le matai e i ai lona faasinomaga, o le aiga, o le nuu po o le itumalo. Na o le pau

le aiaiga lea e mafai ai ona eseese itumalo e palota ai se matai, o le tele o ni ona suafa matai ona filifili lea o ia po o fea le itumalo e palota ai. Ae peitai, o le talosaga po o le mau na momoli mai, ina ia mafai ona resitalaina le toalua ma le fanau e ese itumalo e matai ai, aua ia manatua o le tatou Tulafono o le mea lava e te suafa matai ai o le mea foi lena e te palota ai. A o lea la ua aumai le manaoga pe sa faapitoa mo sui tauva ia fai se aiaiga o le Tulafono Tau Faaofi e mafai ona aumai ai isi matai ia, o le toalua ma le fanau mai isi itumalo e palota i i. Ia, o le agaga lava ia i le faavae o le faa-matai o lo o alu ai a tatou faiga palota, ona e i ai lava le agaga o lea o le a see ese ma le faavae, o le matai, o lona faasinomaga, o le aiga e ona le matai, o le nuu ma le alaafaga o le suafa lea, aemaise lona itumalo. O lona uiga a tatou tuua i se isi faaupuga, o le a pulea e ulugalii ma a latou fanau le mea e feoai ai matai, a o le matai lava ia e i ai lona faasinomaga.

Lona lua i lena vaaiga i le faavae lava ia o le faa-matai, o le vaaiga lea faaletulafono, a faapea e fai se suiga faapea, e le o se mea amiotonu le fai mo na o sui tauva, a ua fai mo matai uma, ma toe foi mai ai foi lea i le manatu muamua i le faavae lava lea e i ai, ua matua tele lava le malepe o le faavae faa-matai, e faasino i le nuu, le aiga, le itumalo pe a faapea e feaveai o tatou matai, ona o luga o ulugalii ma a latou fanau. O le mea lea lau Afioga i le Fofoga Fetalai, ua manatu ai le Malo i luga foi o fautuaga, e le talafagai lea faamoemoe pei ona taatia mai.

FOFOGA FETALAI: Malie lava se i avatu le avanoa mulimuli i le sui usufono mamalu Aveau.

Tofa Aveau Tuala Lepale Niko Palamo: Faafetai lava i lau Afioga i le Fofoga Fetalai, faafetai foi i le Afioga i le Tamaitai Minisita mo le faamalalamalama o le vaega lea, ona e pei o au lea sa lauga i le vaega lea. Na ala ona avatu se manatu, ona o lea ua tatala i le urban, e pule le tagata e matai pe a e nofo i le urban, pe e te matai i le freehold land le mea lea e te alaala ai, pe e te matai i le alaafaga lea e te palota ai. O lea la e tatala le Tulafono lea i le urban. O lea la na ala ai ona avatu le... afai ua tatala i i, ia, immediate family e le gata o sui faatutu, a o tagata foi ua resident ai i totonu i i, aemaise lava tama po o tina o latou e ona nuu lea e nonofo ai ma aiga ia. Ma le faaaloalo lava.

FOFOGA FETALAI: Malo. Lealailepule.

Tofa Lealailepule Rimoni Aiafi: Faafetai lava i lau Afioga. E taua tele le vaega lea, leaga ia manatua foi, lea sa ou lauga ai talu ai lea sa de-register ai le matai o lou toalua, ae palota ia te au i le palota na tea nei. O le mea lea pei ona saunoa le sui usufono faatoa uma atu nei, ia faaeteete lava o outou finagalo leaga o lea ua tatala, ua filifili ai le matai lea e nofo i le taulaga pe filifili ai i le mea e nofo ai po o le mea e matai ai. Ae laitiiti lava le Tulafono. Ia manatua la, o lea ua avatu le tusi mai tai e aveese ai le matai o lou toalua alu atu faapalota ia te au, ae alu atu i tua i le aiga fai mai le aiga, e leai se feau a outou e aveese ai fua le matai o lou toalua. O lena lava mea sese o le palota ae o le a aveese ai fua le matai o le fafine ia ae le palota ia oe? E le o toatele foi ni tagata o lea tatou te vaavaai i ai, na o sui tauva, ia tatou te vaavaai i ai, i se avanoa e fetalai ai le finagalo, aua o lea ua tatala le avanoa. E i ai le mea e

tau o le Tulafono, ae i ai foi le mea e tau o le logic, le common sense. O le mea lena e tatau ona... Ma le faaaloalo lava.

FOFOGA FETALAI: O lea ua maua le finagalo o le sui usufono. Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi: Malo faafetai. E pei o le mataupu lea e manao lava e laga ae matamuli foi le taofi, ona i faitauina ua naunauta pe naunau malo se manatu. Ua saunoa lau Afioga i le Tamaitai Minisita o le maualuga o le tulaga o le tatou palota, o le faa-matai. Ia, o le faa-matai o le aganuu foi lena, aua tatou te taua le faa-matai o le faa-Samoa, o le aganuu. E itiiti foi aa o le laau i aa o le tagata Samoa, e fai la o le aiga o le tama, a o le aiga o le tina, a o le aiga foi o le tama o le tama ma le aiga o le tina o le tama. E faapena, e le masino. Ae talu ai la ona o le tatou faa-Samoa ma le aganuu, e pei lava foi ona talau atu i te i ua umi sau faamatalaga ae ona o lea ua saunoa o le mea lava e finagalo i ai le Malo ma lau Afioga i le Tamaitai Minisita o le mea lena e fai. Ae na o ni manatu, ae mafua mai luga leaga o lea ua tatala le avanoa i Itumalo Tu Taulaga. O lea la ua tatala i le isi pito ae nonoa i le isi pito.

E pei la o le itu lena e lagona ai le faanoanoa, ae ui i lea, o le manatu lava o le tagata o lena, a o le mea lava e i ai le finagalo o le Malo, e alu lava i le i'a a le tautai a le faalolo, ae pei o le tulaga lena, e nonoa le isi pito ae tatala le isi pito. Faafetai.

FOFOGA FETALAI: Malo. Tulai mai lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, sa fefulisai lava le mataupu lena i Matagaluega aemaise foi le Kapeneta, ma sa manatunatu i ai e le i faapea sa tuumamaina foi e le Malo pei ona saunoa le Taitai i lo outou saunoa mai i le Fonotaga ua mavae lea e taumafai mai ai tatou Tulafono ia e faagasolo.

I le saunoa mai foi i le itu lea faapea ua tatala i le urban, o le mea foi lea o le tuufaafegagai o itumalo faaalaalafaga. Aua a sau le matai mai le isi itumalo faaalaalafaga palota i le isi itumalo faaalaalafaga, e ono mafai ona tatou faapea, o lea ua sau le tagata e matai i le isi mea fai le faaiuga i i. Ae a tatou tuu i le urban, o lea lava tatou te malamalama i le urban, o lo o faavae i luga o fanua umia saoloto, ma e leai se pulega faa-afioaga ma ala-alafaga o afaina ai.

Ma le isi vaega lau Afioga i le Fofoga Fetalai, o le tatou Tulafono foi lea faavae o Faiga Palota, o le isi lava agavaa o le ave ma sui tauva, o le ave o oe ma tagata palota o le lola o le itumalo lea. A tatou tatala le mea lea, e ono mafai foi ona faapea, ua sau la le matai mai le isi afioaga ona o lona toalua lea e matai i i a o lea la e faapea, e i ai lona avanoa faaetulafono e ave ai foi ia ma sui tauva o le itumalo lea, ae le matai ai.

Ou te talosaga atu, ou te iloa lava le naunautaiga o a outou Afioga i sui usufono, ona o le mea lea e faafeagai ma outou po o tatou i le taimi nei, ae le faapea foi e ese mai lea mea i isi palota talu ai. O isi foi palota talu ai o lena lava sa suafa matai outou faletua ma outou alo foi i isi itumalo, ia, na faapena lava ona... e ui ina faigata pe o le taumafai foi o nisi e aveese o latou suafa matai, a o le faavae lava lea o le tatou faiga palota.

Tofa Lealailepule Rimoni Aiafi: Lau Afioga faamolemole lava, e fia faasao le vaega lea. I le faiga palota lea na faatoa ou sau ai i totonu i le 2005 ma ona tua atu, sa ave le aiatatau i tagata pe faaaoga lona suafa matai pe faaaoga lona igoa papatiso, taulelealea. O le mea lena sa sau ai. O le filifiliga saoloto lena lea e taumafai lava matou e tau atu, pe faaaoga lou suafa matai, pe faaaoga lou igoa taulealea e te palota ai. Na o le palota lava le mea lea tatou te talanoa i ai, tatou te le o talanoa i le aveesega o lou matai ma lau tautua ma mea faapena. Aua le ninia faatasi mea lau Afioga, o le aganuu, o le matai ma mea uma, e le aveesea mai le palota, o le palota na o le faaaliga lava o lau aiatatau. Aua o lea tatou te talanoa i le mea lea, o le faaaliga o lau aiatatau. O lea pei e foliga o le a nini faatasi o se mea faaleaganuu le faamamafa o le matai ma toe foi i le matai. E le o talanoaina, is not an issue le mea lea. Na pau lava le mea lea e talanoaina, o le matai, o le a le mea e te manao i ai, e fia faaaoga lou matai pe faaaoga lou igoa taulealea? O le freedom lena lea sa ave i le amataga o faiga palota, faatoa sui nei i le palota lea na uma atu nei. E faigofie lava la ona toe tatala. Ma le faaloalo lava.

FOFOGA FETALAI: Ia, tulai mai le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, o le mea lea na ala ai ona agai lau lauga i le ese o le Tulafono i i, ese le Tulafono i o. Silasila la i le tatalaga o le Tulafono i Nofoa ia Tu Taulaga? Afai o le sui faatu e i ai ma lona faletua e matai i le isi itumalo, o lea e mafai ona resitala i Itumalo Tu Taulaga. Ou te le iloa la po o lea le mea o le a ese ai le Tulafono mo Nofoa Tu Taulaga, ese tatou itumalo, ina ia laugatasia uma sui faatutu. Afai la ua taofi sui faatutu a itumalo, e tatau foi la ona taofi i Nofoa Tu Taulaga ina ia tutusa. Ma lou faaloalo lava.

FOFOGA FETALAI: O lea ua maua taatia mai laia, ou te manatu foi o lea ua faamauina e le Minisita. E le i uma a tatou Paeaiga, o lea e tele lava taimi e i ai isi Teuteuga e agai mai.

Tulai mai lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, o le mea lava lea e tuliloa lava le mea e manao i ai le sui lea e tauva. A o lea foi sa talatalanoa atu i le faavae lava o tatou faiga palota, o le faa-matai. O lea ua outou aumaia e le tutusa Itumalo Tu Taulaga lea faatoa faavae ma le faiga o tatou itumalo faaalaalafaga, ia, o lea foi ua faamalamalama atu lau Afioga. O Itumalo Tu Taulaga e leai se pulega faa-alii ma faipule, e leai se pulega a nuu po o itumalo, o tagata o lo o nonofo i luga o latou fanua umia saoloto. E leai la se aafiaga o i ai e pei o itumalo faaalaalafaga, le omai o matai o isi itumalo e palota i le itumalo faaalaalafaga lea. E malamalama lava lau Afioga, e mafai lava ona tatou finau a ua aumai le mau, e ui e le o i ai i totonu o le tatou Tulafono Tau Faaofi, a o lea e avatu ona o mataupu sa laga mai e a outou Afioga i le tatou Fonotaga talu ai, ma e manao foi le Malo ia e tali atu pe afai e mafai ona fai. Pe a le mafai ona fai i ai le faaiuga a le Malo, ia tatou malilie ia.

FOFOGA FETALAI: Malie lau Afioga i le Minisita se i tuu atu le avanoa i le Afioga i le Palemia.

Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui: Lau Afioga i le Fofoga Fetalai, se i tau atu le mea lea. O le tausaga e 1982, e tele lava le mea na tupu ai i ina i le 1982, ona o mea nei o Tulafono. Na faavae mai le tausaga e 1982 le faiga lea o lo o faagasolo nei, e uma loa faiga palota vaavaai, fai le Commission, ae tilotilo i tulaga sa faatino ai le faiga palota ina ia tau taofia mea ia o uiga eseese e talepe ai le Tulafono, o Tulafono e taumafai le Malo e fau, ma tuuitiitia ai auala e faasao ai ni mea piopio. O le tausaga la e 1982, na amata mai ai Ids. Na mafua ona fai Ids, ona o le taimi muamua lea na pau ai se Palemia o Samoa, pau ai i le moliaga ona o le tulaga lava lea o le lē mautinoa lelei o tagata e sau e palota, ua sao mai ai ma tagata e palota i igoa o tagata ua leva ona feoti. Ona manatu loa lea o le Malo i le taimi lena, o le fofoga lea o mea uma, e le toe i ai ni mea piopio e tulai mai pe a fai Ids. Ona fai loa lea o le Tulafono, pasia loa fai loa Ids. O le a la le mea lea ua tupu ina ua tulai mai Ids? O le fafa atu i luga o isi mau avega i luga o isi mau avega. Ua te i lava ua feoai faipule, feoai faipule e sue mai tagata e fai o latou Ids. A o le a le mea e fai e le aufai palota? E na o le nofonofa lava i le fale, sau Kome avatu fai le Id, ia alu tiai le Id, ae sau Simi i le taeao toe alu fai le isi Id, e uma ae ua fia sefulu ia Ids ae ua atili taugata ai ia le Faiga Palota. O le mea lea, o lo o taumafai ai ia le Tulafono ma taumafai le Tamaitai Minisita e tau atu, e ese le faigata i le Kapeneta o le mea lena o le faataoto o Tulafono ona taofiofi loa lea ia aua ne i toe sao ni tulaga e tulai mai ai isi mau togafiti e tele. O le manatu la lea, e tupu uma ia tatou lena mea, pe a ta nofo lava ta ita ma mafaufau, e pumoomoo ia ta ita i le tatau o le toalua o la e matai i o ona palota mai, e tatau i lota atalii o la e matai i o i le isi nuu ona palota mai. Afai e ta te manao e tuu atu i le Tulafono le mea lena, Oka! Oka!, le anoano o mau isi faafitauli e tulai mai ai. A o le mea faigofie lava, afai e te manao e faapalota lou toalua ma lau fanau ia te oe, faamatai loa i matai o lo outou nuu, ona uma loa lea, ia vaai i le faigofie. Masalo afai e le o faia i le taimi lea ua tuu atu le mea lea o se mea e fofoga ai faafitauli, e le toe... e oo atu i le isi mea e leai lava ma se isi ua toe pisa, aua foi o le a nofo loa le tagata ia ma faamatai lona toalua ma lana fanau i i le itumalo e faatinoa le mea lea. Ae afai ua e io lava oe e matai i o i le isi ma le isi itumalo, o le mamalu lena o le faamatai, tu loa i luga ma alu i o e fai lou tofi, na ala ona e alu e te matai i o, o lou alu e tautua le la nuu ma le la itumalo, ae soia e te nofonofa i tafatafa o lou tama, o le mea lena e ote atu lava lou tama a o lea lava e te tamaitiiti ua e le masani i le tauave o ou tulaga faamatai.

Lau Afioga o le Fofoga Fetalai o le taua ia o le taumafai o le Malo e tau taofiofi nai mea ia e ono sao mai ai le tulaga o le toe afaina lava o tatou Tulafono, ona o nai mea laiti ia e fitoitonu ia tatou, ua oo i le taimi e tatau ona tatou mafaufau ai e vaai i le bigger picture ae suia le tatou te vaai pumoomoo i mea tatou te mananao i ai mo tatou lava.

Afioga Hon Leaupepe Toleafoa Faafisi: Lau Afioga i le Fofoga Fetalai....

FOFOGA FETALAI: E manatu o lea ua tatou taunuu i le tatou taimi malolo, o lea ua tonu lava le itula e 1:00.

Afioga Hon Leaupepe Toleafoa Apulu Faafisi: E puupuu lava lau Afioga.

FOFOGA FETALAI: Ia.

Afioga Hon Leaupepe Toleafoa Apulu Fafisi: E tulai atu e faafetai i le Taitai o le Malo. O lea la ua manino ma malamalama ma avea foi ma fautuaga mo le agai i luma, mo le fautuaga tuu sao o lea ua manino le sui usufono mo Faleata sisifo ma le Afioga i le Taitai o le Itu Agai e tusa ai le finau atu o lenei itu ae faafetai, faafetai i lau Afioga i le Tamaitai Minisita.

Tofa Lealailepule Rimoni Aiafi: Lau Afioga i le Fofoga Fetalai, pei o le mea lea e taumafai atu ai lou sui usufono, faafetai ou te le o popole aua o la na ou fai atu e aveese lou matai, aua o le mea lea e tupu, a o atu nei e aveese le matai o le fafine, lesitala, uma le palota malo, toe omai i tai toe lesitala foi, se i vaai le faigofie o le mea. A o le mea lea e tatou te talanoa i i, leaga ua saunoa soo le Afioga i le Tamaitai Minisita, matai, matai, matai, lau Afioga e le o se faiga matai lea e fai i i le aso lenei, o le faaliga o le aiatatau e te palota ai. A o le mea lea na ou tulai atu ai lau Afioga, ua saunoa soo le Afioga i le Tamaitai Minisita e faapea, o nuu e leai ni pulega. Ma lou faaaloalo lava, o nuu lea ia e i totonu o le taulaga, o tagata ia e fai mai ma afifio i totonu iinei i le taulaga i Vaimauga ma Faleata, o lea e omai afifio i totonu o eleele o Vaimauga ma Faleata, ma e taofai i pulega a nuu nei. A fai le maliu i Vaitele ma Siusega, e o atu Faleata faamamalu, e le mafai ona tutulia. O lea na tautalaina le tulafono a le Afioga ia Tolofua, e aumai ai ma le Tulafono Village Fono Act, e aia tatou e ave le faamamalu ia i latou o nonofo i le nofoa i fanua tumaoti, tatou te le lue faatasi. Afai o lea, omai e palota. O le isi mea ua fia sui usufono mai Savaii o lea e malo atu i Apia, ua fia? E le palota e tagata Savaii tagata Savaii, o lea e palota atu iinei i Faleata ma Vaimauga, o le aiatatau lena. A o le mea lea faapea o le omai o tagata mai tua palota sui o Faleata ma Vaimauga, sese, o lea sa sa'o na o le omai a palota matai a Faleata ma matai a Vaimauga o lo'o tutu mai le tofi, o matai na o le itumalo o la e pulea e latou latou, a o le omai lea palota i matai e le o ni matai o itumalo lea i i, o le mea lena e tau o le aveese ma le pule, ma le faaaloalo lava.

Afioga Hon Palusalua Faapo II: Lau Afioga i le Fofoga Fetalai e puupuu lava, ona o le saunoaga a le Afioga i le Palemia, a e manao e matai lou toalua ma lau fanau ia oe, alu oe e fai le matai, o mea ia na tutupu i aso ia la lea na tele ai faamasinoga, toulua ai isi Palemia ona o le matai e fai ona o le palota. O le mea lea ua ou tulai atu e faamalulu atu i lau Afioga i le Fofoga Fetalai....

Susuga Hon Tuilaepa Fatialofa Lupesoliai Neioti Aiono Sailele Malielegaoi: Lau Afioga i le Fofoga Fetalai, o lea sa tatou talanoa i le palota, tatou te le o talanoa i se isi mea. Afai e te naunau ina ia palota lou toalua ia te oe ma lau fanau, e lua lava mea, o le ave e faamatai pe aua le faamataia, ia vaai i le faigofie.

FOFOGA FETALAI: Ou te manatu o lea ua....ia tatou faatea lea fuilauvi, ua lima minute e tea ai le itula e tasi.

E momoli atu le agaga faafetai i le paia ma le mamalu o le tatou Palemene, ou te manatu o le a tatou faia se malologa. O lea ua uma ona faatu le tatou lafo i le taimi ua sola i le itula e 7:00 i le afiafi, ia ona tatou papaaveloa lava lea seia maea le tatou galuega i lenei afiafi. A o tulaga ma faamoemoega e

talosaga atu ina ia tatou toe faatasi nei i le itula e 7:00 i le afiafi aua le toe amataina o le tatou galuega. A o tulaga i lenei aso, e momoli atu le faafetai tele i tuleiga ma saunoaga ua opea i le Maota.

E faasilasila atu o le a faataatiaese Taulumaga o le Fono Aoaofaitulafono seia aulia le itula e 7:00 i le afiafi a nanei.

Na faataatiaese Taulumaga a le Fono Aoaofaitulafono i le itula e 1:06 i le aoauli.